



6436





*HRC.*  
ANTONII DE HAEN

*S. C. A. Majestatis Consiliarii, & Archiatri,  
nec non Medicinæ practicæ, in alma, ac  
antiquissima Universitate Vindobonensi,  
Professoris Primarii.*

DISSERTATIO MEDICA  
SISTENS

EXAMEN TRITISSIME PROVERBII

MEDICINA TURPIS  
DISCIPLINA



NEAPOLI MDCCCLXXVIII.

---

Sumptibus FELICIS IPPOLITI Bibliopolæ  
*Superiorum Permissu.*

9671

## EDITOR LECTORI

S.

**T**anta est hodie Clarissimi Viri ANTONII DE HAEN fama , ut omnia , quæ in lucem edit , opuscula avidissime recisciantur : eam ob causam Dissertationem ejus inauguralem , in qua Medicinam ab omni contemptu pulcherrime vindicat , & simul peritiam suam , & eruditionem , quam tunc temporis jam consecutus erat ; quod omnibus Medicinæ fautoribus pergratum fore existimo . Vale ! Lector , omnibusque Clarissimi Auctoris laboribus fruere tuo bono ,

## P R O C E M I U M.

**A**Quinque ab hinc annis, quibus mētem  
Medicis Studiis applicuit, tot Scommata  
in Medicinam, ut in Artem incertam plane, ac  
plerumque ridiculam audivi, legique, ut multo-  
ties animum despoderem, atque s̄epius, ante-  
quam rem penitus introspiceram, mei me propo-  
siti tæderet, illudque relinquere ne an prosequer-  
rer, redderet ancipitem.

Neque enim infima de Plebe Viri, aut ani-  
culæ Medicis plerumque, ut ipsæ ferunt, sapien-  
tiores, hæc Scommata proferebant; sed ejusmodi  
homines, quos ob ingenii acumen animumque  
cum Litterarum, tum aliârum excellentium Ar-  
tium, & Disciplinarum Studiis exultissimum,  
summa cum animi veneratione prosequor.

Verum prima Medicinæ transfigenti Tyrocinia  
sensim nonnullarum, ob quas vituperabatur, cau-  
sarum vis debilior, veroque absimilior visa, cal-  
car addidit num ne omnes solidis carerent funda-  
mentis ut probe examinarem.

Quare & in toto studiorum decursu numquam  
non intentissimus, ubi vel Clarissimorum in hac  
Academia Medicinæ Procerum Instructionibus  
affiduus interfui, vel optimorum Auctorum mo-  
numenta sedulus pervolvi, an scrupuli hi animo  
eximi meo possent; magis intellexi magisque, o-  
mnes hæc objectiones nullius faciendas esse: ut-  
pote vel ridiculas, vel veritate carentes, vel re-  
spic-

spicientes tantummodo malos medicos, aut semi-doctos quosvis Magistellos, qui præclaram quam vix intelligunt artem in humanam perniciem profitentur.

Quæ cum animo revolverem sæpius, Chartis que ne labili memoria exciderent, quotidie mandarem, pepererunt tandem hancce materiem: quam Academiam relicturus, ejusque præclaris, pro tenuitate mea satisfactus Legibus, Themati inaugrali conflando dedicandam duxi.

Quo quidem a proposito nonnulla me aliquantulum deterruerunt; me, inquam, juvenem, vi- rium tenuitatis probe gnarum, maturiorisque quod ad hocce opus conficiendum requirebatur judicii.

Tamen cum scirem ab iis qui Medico condecorabuntur honore tantum modo eorum quæ in Academiis didicerunt, non eorum quæ ipsi experti, aut commentati sunt, specimen peti: quumque præterea animus esset ejusmodi Themat componere quod tenues meos in Medicina Profesus non tantum testaretur Clarissimis, quos frequentavi Professoribus, sed & aliis Claris Viris tam Consanguinitatis, quam Dulcis Amicitiae mihi copula nexas, vel ob gratam in me benevolentiam maxime colendis, ad prius a quo discesseram, propositum redii.

Namque primo fere nihil me Scripturum præsciebam, nisi quod summi, & ad cineres usque colendi mihi viri, in hac Academia Medicæ Facultatis Lumina, omni modo meo inculcare ani-

mo conati erant; vel quod ex præstantissimis ab  
ipsis conscriptis commendatissive voluminibus hau-  
seram: Secundo materiem fore quæ viris alio,  
vel & nobiliori studiorum genere occupatis ma-  
gis arrideret, facile crediderim.

Verum nimiam materierum molem intra tam  
arctas congeffisse pagellas multis videbor, vide-  
borque merito: sed sciant hi materiei seorsim sin-  
gulæ pro dignitate tractandæ nec tempus nunc  
esse nec in Thesibus propositum; unius vero pro-  
ductam pertractionem ei, quem mihi proposue-  
ram, scopo minus satisfacturam videri.

# DISSERTATIO MEDICA

S I S T E N S

EXAMEN TRITISSIMI PROVERBII

## MEDICINA TURPIS

D I S C I P L I N A.

**R** Ationes, ob quas turpis Disciplina Medicina audit pluribus, hæ potissimum sunt.

I. Magnam esse sententiarum in theoretica humani corporis contemplatione discrepantiam ; tum Antiquos inter Recentioresque, tum, & inter ipsos recentiores coœvos.

II. Ipsam vero Praxin continuæ sententiarum, & curandi Methodorum mutationi turpiter subjacere.

III. Situm Dispositionemque partium intra corpus latentium, imo vel ipsum externum corporis habitum, nonnumquam ita imponere Medicis, ut in Diagnosi, & Prognosi alucinentur quam turpissime.

IV. Medicos ipsos suam curtam prodere suppellettilem dum, quotquot probi inter eos existunt ingenue fateantur complures se morbos sanare non posse, imo plures morbos, eorumque causas, se ignorare.

V. Homines plures visos absque Medicorum ope curatos.

VI. Sanatos homines adhibitis quidem Medicis, sed eisdem vel ab Ægro, vel a Pharmacopæo, deceptis.

VII. Alios sanitati reddidos rerum usu earundem, quas audacissimo præsigio pessima quæque effecturas Medici prædixerant.

VIII. Teterimis e morbis convaluisse homines, curantibus ejusmodi Medicis, quos famosi alii artis Proceres tamquam pessimos, utpote vel fortiore, vel segnore, quam oportet, Methodo, uti solitos, traduxerant.

## §. I.

*Magnam esse sententiarum in Physiologica humani corporis contemplatione discrepantium: tum antiquos inter Recentioresque & tum inter ipsos Recentiores coævos.*

Fateor lubens veram esse totam hanc propositionem; caufamque tantæ discrepantiæ variam agnosco.

Descriptiones anatomicæ partium corpus humanum constituentium earundemque usus variant incredibiliter, prout lumen majus per diversas sœculorum series rebus affulsit; atque etiam prout indefatigata mortalium industria naturam experimentis lacessivit, & ad admit-

ten-

tendos homines in abdita , in quibus sublite-  
scet penetralia coegit .

Ut enim artes omnes in cultum prius & in-  
forme Chaos deinde per gradus , post multi-  
plex observationum Genus ad formam Artis  
ductæ , atque magis exultæ magisque ad ali-  
qualem , qua nunc gaudent , pérfectionem ad-  
ductæ sunt ; ita & huic Medicinæ parti eve-  
nit . Anatomicum quoddam corpus rude certe ,  
atque inconditum prisca habebat Ætas , quod  
suppeditaverant . 1. Extispicia Sacerdotum sin-  
gulari quodam ritu animalia viva eorumque  
partes tractantium ; ac Numini summo apud  
veros Dei cultores , denso vero Deorum ficti-  
tiorum , Dearumque agmini apud Idololatras  
gentes offerentium . 2. Cadaverum Balsamo  
condiendorum mos , maxime ille , quo viscera  
eximebant singula , ac Balsamis , Arematibusque  
contra putredinem muniebant . *Herodot. Lib.II.*  
*Euterp.* hoc fuse describit . 3. Vulneratorum  
Hominum Inspectio Pertractatio , & Curatio .  
4. Laniena ipsa partes animalium eximens , re-  
purgans , in quibus mortales , qui vulneratos  
vivos , vel & Balsamis condiri mortuos vide-  
rant , multa consimilia repperere . 5. Incisio  
vivorum animalium in philosophicos usus , me-  
dicosque ut *Democritus* fecisse legitur in *Epist.*  
*Hipp. ad Damag.* 6. Examen ipsorum cadave-  
rum hominum certis morbis defunctorum , ut  
*Hippocratem* fecisse ex multis suorum operum

locis indubitate constat : & ut teste *Eusebio Cæsariensi Episcopo* antiquissimus Scriptor *Manetho* tradit *Athosten* Egyptiorum Regem ipsum per se se lustrasse cadavera , morborum scilicet ut rimaretur causas .

Alia , sed pauca , subsequentes addidere extantes ; ita ut post *Galeni* tempora vix pauca reperias , quæ prius , saltem ex parte , nota non fuerunt .

Sæculo tandem XVI. nova Lux affulsit *Carpi* , *Mundini* , *Vesalii* , ac maxime *Eustachii* industria , necnon sedulitate multorum in Patavina Scola Anatomicorum .

Demum prioris Sæculi anno 8. post 20. Harvæana Lux orbem fere totum passu quam celerrimo illustravit , quando sanguinis humorumque per corpus circulum immortalis Harvæus in Anglia ad formam doctrinæ perduxit : cuius circuli rudia quædam lineamenta visa *Nemesio Episcopo* , Sæculo IV. *Paulo Sarpi* , vulgo dicto , & eruditis noto nomine *Fra Paolo* , Veneto Theologo , Sæculo XVI. *Michaeli Serveto* , vivis Genevæ combusto flammis ; *Andræ Cæsalpino* , Italo acutissimo Lib.V. quæst. peripatet. *Realdo Columbo* in Patavina Scola professori . Verum de omnibus his merito dici potest id , quod *G. Baglivius Professor Romanus Prax. med. cap. XII. §. 1.* loquens de Cæsalpino eleganter pronuntiat . „ Quoniam „ sola , inquit , mentis acie ad præclarum hoc „ per-

„ pervenit institutum , nec . . . experimenta  
 „ adhibuit , nihil mirum quod , & operis ar-  
 „ gumentum re liquerit imperfectum . . . Quod  
 „ animadvertis *Harvæus* non solum rationem ,  
 „ sed experientiam ipsam hac de re consulere  
 „ voluit : idcirco tamdiu Naturam experimen-  
 „ tis vexavit , tamdiuque sectionibus Anatomi-  
 „ cis lacepsivit , donec tandem ad veritatem  
 „ fatendam coegerit .

His præclaris inventis demum accessit quid-  
 quid *Malpighii* *Svamerdammii* , *Leeuwenhoe-  
 kii* , *Ruyshii* , *Morgagni* , *Santorini* , ac præ-  
 primis venerandi Præceptoris mei Cl. *Albini* ,  
 ( cuius Lucubrationes eruditissimas Medicus  
 orbis brevi obstupebit ) indefatigata industria  
 ad Anatomen subtiliorem excolendam , contu-  
 lit .

Quæ cum ita sint , injuria hinc quispiam  
 hancce Medicinæ partem vituperet : Si quidem  
 eo pluris artes alias , disciplinasque facimus ,  
 quo major ipsis perfectio accesserit . Egregia  
*Ars Nautica* plurimi semper æstimatur , utilis-  
 que cum maxime : quam & industria , & au-  
 dacia humana in faciundis periculis , ex nulla  
 fere , eo promovit usque , ut cum primo in-  
 domitum mare mortales horrerent , dein illud  
 auderent transire juxta litora lambendo , nunc  
 pleno gurgiti sese committentes , *sævum mutan-  
 dis mercibus aquor arant .*

Secundam causam hujus discrepantiae senten-  
 tia-

tiarum circa Theoriam Medicam , eam reor ,  
 quod homines antiquis , quibus imbuti sunt ,  
 opinionibus haudita facile renuntiare solent .  
 Neque etiam sapientis est suam sententiam ,  
 audita nova , illico mutare : alioqui unus homo  
 brevissimo vitæ caducæ spatio decies forte de-  
 beret mutari sententia . Semper enim fictricis  
 Ludibria mentis Incautis imponerent , dum no-  
 va rerum facies plerumque arrideat . Ita novi ,  
 quid , minus licet bonum , suos ubique fauto-  
 res invenit . Viget Incolmis nova sententia  
 donec summa ingenii acuties plausibilis aliud  
 subtiliusque excogitet ; cui denuo plerique af-  
 sentiuntur . Videatur *Gassendus de Epicurea*  
*Philosophia latinissimus Celsus & Barcius de*  
*variis Medicorum sectis , & placitis* ; quibus  
 patet ejusmodi figura ingeni ad tempus in  
 honore esse , verum ab aliis subtiliora profe-  
 rentibus explodi ; hæc iterum ab aliis refutari ,  
 & sic porro in infinitum . „ Hinc pulcre *Lu-*  
 „ *cilius apud Cicernem Lib. II. de Nat.*  
 „ *Deorum* Etenim , inquit , videmus cæteras  
 „ opiniones fictas , atque vanas , diuturnitate  
 „ extabuisse . . . opinionum enim commenta  
 „ delet dies , naturæ judicia confirmat „ . Ve-  
 rum ab alia parte cum sapientem virum de-  
 ceat docilem semper animum gerere , ut ad  
 nova saepiusque confirmata experimenta latitan-  
 ti olim , nunc prodire coactæ , veritati relucta-  
 re non videatur , dedebeit summopere antiquæ  
 opinioni mordicus inhærere .

Hu-

Hujus rei exemplo esto mox recensita Harvæana Doctrina. Adversarios sibi complures conciverat ingens *Harvæus*, qui rei novitate perculsi eam fere instar Hærefoes condemnabant. Quales in Anglia *Primerofius*, *Riolanus* in Galliis, &c. Verum *Harvæus* suos Adversarios (ut contra plerumque fieri consuevit) contumeliose excipere non solitus, sed ratione atque experimentis iisdem respondere conatus, ferme omnes ante mortem sibi devictos vidit. Sic unus tardius, citius aliis demonstratam veritatem amplectitur; obtinentibus plerumque non nullis, quos utpote ratione convinci impotes, sibi linqui expedit: donec tandem vel latratu fatigati sponte obmutescant.

Sed & s. Causa subest hujus in sentiendo diversitatis, petita ex præcipiti & quasi volante Mortalium ingenio, quo fit ut debitam rebus examinandis sedulitatem negent. Memor siquidem homo quod sit *Divinæ particula auræ* speculationibus, & ludicris Phantasiæ figmentis extasiari & vagari amat, hincque subtilitate ratiocinantis ingenii supplere conatur, quod alii sola indefessa indagine, & lenta patientia expisci potuerunt. Omnia fere absurdissimarum opinionum in quavis scientia vel arte hæc origo, hic fons est. Hinc & in Physiologia Medica prodiere tam absurdæ explicationes circa Chylopoiesin, Hæmatopoiesin, Pneumatopoiesin; ut dies deficeret omnia ex ordine narrare vo-

len-

lentem. Cum interea qui castiore ingenio prædicti sunt priorum periculis admoniti, in solos rerum Eventus intueantur, sola experimenta consulant, patientia observandi ætatem absument; atque sic tandem mira & stupenda simplicitate veritatem abstrusam extricent inveniantque. Ere foret simplicitatis hujus in memoratis modo functionibus explicandis subnexuisse exempla; verum cum angustos thesos Limites exfilirent, malim hæc in adnexis post thesin proponere, ac defendere, corollariis.

## §. II.

*Ipsam prixini jugi sententiarum, & curandi methodorum mutationi turpiter subjacere.*

Propositionem hanc, licet aliquanto ignominiosius prolatam, veram sæpe fuisse cogor facteri; strenuam interim navaturus operam qua præclaram artem Medicam ab iniqua Labe quam vi conclusionis ex hac propositione, eidem co-nantur inurere, vindicem.

Itaque Praxeos exercendæ Methodum ab initio Medicinæ notæ haud ita fuisse, quam quidem Eam subsequentibus deinceps ævis, aut hodie exercent, facilis dabo.

I. Quia Medicinam in Artis, quam tandem accepit, formam condere mortales, nisi multipli multorum annorum observatione, nequievant.

II.

II. Quia Praxi Medicæ contigit quod quibusdam aliis scientiis , artibus , disciplinisque ; ut homines non ex solis ratiocinati sint experimentis , sed vi facti de ludicra Phantasia Systematis , phænomena in morbis apparentia explicuerint , considererintque mirificè ; unde variis juxta varia Systemata morborum Curationes adortis ; non nisi ingentes , & miseris mortalibus fatales errores committi potuere , artis tamen absque ullo tamquam opprobrio.

Itaque dico eos qui Medicinam Artis in formam cuderunt , mero tantum casu , & simpliciteruditos esse Observatione eventus . Morbi enim semper fuere quamdiu ea , qua nos , Lege vivere Mortales . Est namque Morbus status ille in quo Homo actiones vitales , naturales , & animales , omnes vel aliquas , fere exercere neguit , aut saltem easdem non nisi cum molestia , dolore , vel cita defatigatione exerceat , Hunc statum obtinuisse a condito primum orbe , quamdiu iisdem Legibus , quibus Nos , obnoxii haferunt Homines , vel hinc apparet , I. quod illis Nobiscum communes fuere aeris , qui hominibus inevitabilis , ac semper necessarius est , injuriæ , & vicissitudines : utpote qui alius sit in hoc , quam in illo ; ut vocant Climate , alias hyeme quam æstate ; alias vere quam autumno ; alias interdiu , ab eo , qui de nocte ; alias uno die , alias alio : alias eodem die , ab eo qui paulo ante regiones perflabat ; alias tempore

pore calido ; frigido tempore aliis ; in humida tempestate aliis , ab eo qui in siccis ; variis præterea , prout supra paludes , lacus , flumina , maria , montes , prata , aut varia alia corpora ad certam regionem deferatur ; variis denique prout a Meteoris immutetur II. communis nobiscum iisdem Alimentorum Natura fuit , quorum nonnulla facile , difficile alia , in nostram permittentur Naturam III. obnoxii fuere Corporum irruentium vi ; sive illa corpora in ipsos infilirent , sive in eadem ipsi illiderent . Ut bene Cicero hinc causam egritudinum deducit *Lib. III. de Nat. Deor.* „ Cum omne , inquit , anima mal patibilem Naturam habeat , nullum est eorum quod effugiat accipiendi aliquid extrinsecus , id est quasi ferendi , & patiënti necessitatem „ . IV. Easdem , quas Nos , edidere Vitæ actiones , quæ certe ab Homine sano diu exerceri constanterque nequeunt , absque novo alimento , quin morbi nascantur . V. Denique fabrica ipsa humanæ compagis se ipsam per se destruens , ni idoneo reficiatur fulciturque nutrimento , morbos ipsis quandoque inevitabiles procreaverit necesse est .

Quibus quidem morbis , quicumque demum erant , abigendis primo impulsus quidam aderat automaticus , seu motus a sola hominis fabrica pendens , veluti movet se Horologium ex viscere fabricæ atque structuræ . Hujus motus impulsu homo , vel animal quocumque ægritudine

ne gemens , ad auxilia ubi ignota confugit , si-  
ne Mētis p̄fscia voluntate . Quemadmodum  
homo inscius omnino Arsenicum sumens , sta-  
tim naufreas sensit , Vomitumque , ut Venenum  
expellatur ; Mente licet haud cōscia , nec de-  
terminante , vel aliquando invita . Ut etiam su-  
ceptum aliquod intra Corpus venenum corpus  
ipsum conatur excitatis sudoribus a se abige-  
re , Mente nihil eo determinante , imo ne cō-  
scia quidem . Ut qui arenulam intra oculum ge-  
rens vi quasi spasmatica palpebras ad oculi  
bulbum apprimat affricatque , quo fit ut Glandula  
*innominata Galeni* eadem actione pressa la-  
crimas producat copiosas , quæ arenulam abster-  
geant . Ut homini vulnerato fit statim inflam-  
matio , dein suppuratio quæ facit pus ; quo ceu  
optimo Balsamo Vulnus percutetur . Hæc , &  
sexcenta ejusmodi alia Homines multa in mor-  
bis proficia docuerunt : Venena scilicet esse ,  
quorum expulsio fiat vomitum aut suscitando ,  
aut suscitatum expediundo ; alia vēnēna intra  
corpus recepta excitatis expelli promotisque su-  
doribus ; arenulas Quisquiliaeve oculo illapsas , si  
natura productis Lacrimis aut premendo ocu-  
lum non sufficiat , aut si corpuscula hæc ni-  
mium intra palpebras bulbumque oculi infixā  
sint , injectu aquæ tepidæ abstergere ; Vulnere ,  
ut curentur , ad bonam suppurationem adducere .  
Modum itaque impulsus hujus ipsa hominum  
non assequitur intelligentia , reperitque tantum-

modo ejus causam in Adorandi Creatoris solo instituto , qui corpus omnium animalium hisce instructum dotibus voluit .

Huc facit Dōs quædam Menti innata , ut ad molestiam doloremve corporis , animique angorem , horo sibi querat , & applicet remedia , in quorum delectu vagum tantum experimentum , vel & spontaneum consulit appetitum . Sic V. C. in siti febrili videoas hominem aquam , aquosa , acidula , quibus Medicina meliora non novit , avidissime appetere ; quod certe Mentis huic adscribendum Doti : siquidem ægro sitis habente Causam , & Potum non appetente , Mentem laborare in confessō est . Hæc Dōs infantis acido laborantis impulit mentem , cretam ut avide arenulasque devoret , quæ usum absorbentium posthac docuere Mortales acido laborantes . Quin & ipsis Brutis invenitur innata facultas similes ei , quam in Homine Mentis dotem appellamus . Sic pulcre *Cotta* apud *Ciceronem Lib. 3. de Nat. Deor.* ,, Nullum posse test , inquit , esse animal , in quo non appetit , tjo sit , & declinatio naturalis : appetuntur autem quæ secundum Naturam sunt , declinantur contraria : & omne animal appetit quædam , & fugit a quibusdam ; quod autem refugit , id contra Naturam est . ,, Causamque hujus Rei dixerat *Libro 2.* ,,, esse in Bellua quiddam simile Mentis , unde oriantur Rerum appetitus . ,,, Et paullo post : ,,, Dedit ea-

„ eadem Natura Belluis , & sensi , & appeti-  
 „ tum ; ut altero conatum haberent ad natura-  
 „ les pastus capeſſendos , albero pestifera ſacer-  
 „ nerent a ſalutaribus . „ Sic vulnerati quon-  
 dam Noſtrates quibusdam venenatis Indorum te-  
 lis plerique omnes moriebantur , aut ſaltem abſ-  
 que Curatione novum morbum producente , non  
 curabantur . Mero viderunt caſu animal par-  
 vum Leonem referens , huiuscemodi telis vul-  
 neratum ſibi herbam ibidem *Mungos* dictam  
 quærens ; ejusque uſu curans venenum : quod ad-  
 vertentes homines , & ſibi eandem applicuere ;  
 curatique ſunt . Ita Bruta hac dote inſtructa  
 docuerunt homines plura adminicula sanitatis re-  
 ſtituendæ . *Proſper Alpinus* in præclaro ſuo o-  
 pere de præſag. vita & morte ægrot . Lib. 7.  
 c. 2. „ Hoc remedii genus , inquit , (de M. S.  
 „ sermonem habens) , Medici ne dum Naturæ  
 „ imitatione invenerunt ſed quibusdam etiam  
 „ animalium exemplis perdocti , præſertimque  
 „ Hippopotami , equi marini ut Plinius eſt au-  
 „ ñor qui ingluvie obæſus , crus in arundinis  
 „ ſtipitem acutissimum adigens , Venam qua-  
 „ dam vulnerando , copiosius ſanguinem effun-  
 „ dit , atque ita fuerit ipsius corporis pletho-  
 „ ram tollere ſolitus . „ Vide , & *Dapperum*  
*Hift. Ægypt.* pag. 147. Eodem Plinio auctore  
 ut & Cicerone Lib. 2. de Nat. Deor. Canis vo-  
 raciſſimum animal , ubi nimium ingurgitaverit ſe-  
 fe vomitum provocat ; hincque ajunt edocſos

homines, ut vomitu, (si sponte non fiat) coacto, infarctum deplerent ventriculum, Avis *Ibis* dicta rostro suo oblongo injecta in anum aqua tepida, obstipatam resolvit alvum; sive usum *Clysmatum* docuit. Vide ex *Plinio*, *Plutarcho*, *Aeliano*, hoc apud *Dapperum* descriptum in *Hist. Ægyp.* pag. 143. *Acta Societatis Britannicæ* historiam tradunt Caniculæ; quæ quotiescumque ab Hera demissa erat ad certam Parietis locum sibi legebat *Parietarium* herbam. Hoc visum quam særissime. Mortui animalis aperta Vesica exhibuit Calculos complures. Norunt porro Medici Calculosis hanc herbam multum prodeesse, ubi viæ emolliendæ pro Calculi in Vesicam transmissu.

Hæc certe & plura consimilia primævos homines plurimarum indicabant ægritudinum solertia: quo quidem sensu Medicina semper dici potest inter homines obtinuisse.

Verum quod Artis sensim formam acceperit proprie effecerunt sequentia adminicula.

I. Casus fortuitus, seu Eventus physicus per sensus observatus, cuius nulla antea cogitatio fuerat. Ut v. g. quando impulsu automatico animal quærit ansie quo demum modo situve dolorem queat levare, ac tandem forte ex mille modis unum invenit, qui sublevet, soleturque. Hoc in Asthmaticis Peripneumonicis, in Pleuriticis &c. evidenter cernas. Ita casus fortuitus multiplex docuit plurima a juvamine vel

numento , quod sanis ægris ab aliqua re adhibita vel omissa percepérant . Ut pulcre *Hippocrates Libro de Prisca Medicina* hanc artem imis suis de fundamentis eruens de monumentis , quæ conservabat , antiquissimis , tradit Eam ortam cum primis ex eo quod cerneretur primo ægrotis obesse sanorum Diæta . Hoc obseruatum pluries tandem occasionem dedisse ut homines cogitarent & minore copia , & dilutiore forma alendos Ægrotantes . Sed neque vel hinc artem nascituram fuisse , si alimenta , & copia minora , & dilutiore forma sanis æque atque ægris convenissent . Verum vidisse sanorum corpora iisdem cum debiliora fieri , tum a perferendos labores ineptiora . Hiuc necessitatem quasdam cudendi regulas in Ægrotantium commoda , & exortam esse , & exoriri necessario debuisse .

Juvit 2. Naturalis instinctus qui ex impulsu automatico , & ex dote Menti increta nascebatur , ut paulo ante patuit . Videmus quomodo plurima hinc eruditi mortales ex - iisdem rude quoddam Corpus Observationum condere potuerunt .

3. Accessit haud prævisus eventus ; quando nempe prioribus duobus instructi homines tentabant , an forte ab alia quapiam re adhibita , aut neglecta idem sequeretur . Sic Cicero supra Laud . „ Multa , scribit , ex Belluarum corporibus remedia morbis , & vulneribus eligi-

„ gimus ; sicut ex quibusdam stirpibus , & her-  
 „ bis : Quarum utilitates longinqui temporis usu,  
 „ & periclitatione percipimus . „ Sed hac pe-  
 riclitatione s̄æpe contrarium sortiebantur effe-  
 ctū , minimeque prævisum . V. C. Viderant  
 hominem febri ita æstuantem , ut jam jam com-  
 bustum iri sese clamitet , aquam potusque aquo-  
 sos acidulos , frigidum aerem tantopere appeten-  
 re , ut cum Lysimaco aquæ potum pro toto re-  
 dimere Regno , quam siti amplius exarescere ,  
 mallet . Viderant & revera hujuscemodi levari  
 nonnumquam homines . Pronum fuit ex hisce  
 cogitare numne æstus intollerabilis melius sedar-  
 retur si gelidæ aquæ , aerisque frigidissimi quam  
 plurimis concederetur usus ? experiuntur . Bibit  
 æger summa cum animi voluptate , ita ut sa-  
 pientissimus Regum in *Prov. cap. 25.* V. 13.  
 hac comparatione utatur : „ Sicut frigus nivis  
 „ in die Messis , ita Legatus fidelis , ei qui mi-  
 „ sit eum : animam enim domini sui refocil-  
 „ lat „ (seu requiescere facit) sed momentanea  
 voluptas in ægrotantibus exæstuantibus citam  
 s̄æpe mortem accellerat . Quibus pluries obser-  
 vatis didicerunt tandem homines aquam tepi-  
 dam , aut frigidiusculam prodeesse febricitantium  
 æstuui , gelidam nocere quam maxime , præser-  
 tim ubi affatim hauritur . Idem de aere judi-  
 cium tulere , ubi æstuans homo gelido in aere  
 quiescens pleuritidem sibi concitavisse s̄apius vi-  
 fus .

Hinc sexcenta talia visa hominibus , atque pluribus in casibus verissima observata , memoriæ mandata fuere eaque ne exciderent scripturæ genere , tunc temporis usitato , descripta . Porro hæc descriptiones non solis privatorum hominum , quo lucrum inde captarent , usibus , sed publice in Templis cuncto patebant populo . Hic celebratus apud Ægyptios mos , atque apud Grajos . Videndi hac super re *Pausanias & Strabo* . Quin & apud Veteres Romanos id moris fuisse pluribus *Cicero* testatur in locis , & confirmat *Val. Max. Lib. 2. cap. 5. num. 6.*

„ Febrim , inquit , ad minus nocendum , templis colebant . . . in eaque remedia , quæ corporibus ægrorum adnexa fuerant , defenserantur . Hæc ad humanæ mentis æstus leniendos cum aliqua usus ratione excogitata , &c.

Quod si Descriptiones templorum affixæ columnis non sufficerent , ægri in triviis exponebantur , & foris ; ut si prætereuntium quisquam , quod in ejusmodi casu profuerat aliquando , novaret benignus indicaret . Cernimus facile ex omnibus his Empiricam nasci Medicinam debuisse , quæ soli tantum præterito præsentique cognoscendo apta erat . Verum , quia morbos plerosque empirice curare impossibile , sensim natum est castissimum ex comparatione observatorum cum præsentibus , & futuris , quam *Analogiam* vocant , Ratiocinium .

Ponatur namque homo apopleticus prima vice primævis apparuisse mortalibus. Hunc profecto bene profundeque dormientem rati sunt. Eo vero post completum somnum non surgen-te, interpellato licet saepius, tacto, punctoque, ac tandem moriente, talem somnum in morbo-rum lethiferorum retulere catalogum. Videntes deinde alium hominem eodem modo se haben-tem, certe ne, ut alter ille moreretur timue-rint necesse est. Verum huic homini copiosus effluit de naribus, aut aliunde, Cruor: post-quam sensim ad sese redit, curaturque. Notant hoc homines, ac sciunt unum apoplexiæ genus, quod si larga hæmorrhagia fiat, muta-tur in sanitatem; ni fiat occidit. Edocti dein-ceps ab animalibus sanguinis missionem, imita-tique Naturam præeuntem secarunt Apoplecti-co, cui sponte sanguis non effusit venam: ho-mo convalescit. Gavisi mortales, ac successu-turgidi, mox alii apoplectico venam secant, sectus venam apoplecticus moritur. Quid inde? cernunt ilico quosdam apoplecticos M. S. cu-rari, alios curari minime. Ergo saltem dupli-cem esse, quæ apoplexiæ gignat caussam; du-plicemque proinde, qua curetur, methodum. Hinc ad analogiam, & ad causarum investiga-tionem vel inviti trahebantur.

Quæ omnia eo majoris artis incremento in-servierunt; quando auctoritate publica viri desi-gnati, qui morbis vel omnibus, vel tantum cer-

certis quibusdam invigilarent. Ut apud *Ægyptios* factum Historici tradunt. Qui iidem viri filios quam artem ipsi callebant, erudire jussi. Ac maxime increvit Ars auctis in dies accuratissimis morbi, ejusque remedii, annotationibus: quam quidem ob rem *Templa Epidauri, Coæ,* &c. celebratissima.

Unde ortum cum primis, ut Sacerdotes Medicinæ professionem sibi plurimum vindicarint, utpote qui templo assidue frequentantes inscriptiones facili marte memorie mandarent. Sanatosque pronuntiarunt ope ejus, cui Famam id sacrum, dicatumque Dei. Quos vulgus dein, ut Dei responsuros nomine consuluit, Numen invocans & ob impetrata sanitate eidem Vota persolvens. Vide *Mercurial de art. gymn. Lib. I. c. I.* Unde & *Tibullus Lib. I. ecl. 3.*

,, Nunc Dea, nunc succurre mihi, nam posse sumederi

,, Picta docet templis multa tabella tuis.  
Quibus deinde accesserunt quæcumque ad anatomicam scientiam condendam originem dedisse incrementumque, ac maxime morborum explicandis causis profuisse pag. II. demonstrata sunt.

His demum omnibus nata fuit doctrina Medica, genuina profecto, ac vere mascula vide-licet ex ipsius Naturæ hausta, & confirmata penu.

Talem Observationum thesaurum nactus *Hippocrates immortale suum* potuit componere opus.

Ait

Ait enim suorum se scripta majorum , qui medica scientia inclarerant , nactum . Ita ut vingesimum Medicum , in sua familia se numeret . Quantus observationum thesaurus ! Quantane fides adhibenda curatissimis hisce adnotationibus , quas collegerant Viri in salutem humanam unice intenti , ab omni fallaci ratiocinandi genere quam remotissimi , solam Naturam contemplati , in seram usque ætatem observando occupati , graves , severi , qui nonagenario , centenario maiores notata a prima juventute cum iis quæ senes observabant , contulerunt ; collata adnotarunt ; ut in seros usque nepotes castissima doctrina seu per traducem , propagaretur ! Sed neque his modo contentus Magnus ille Medicinæ Parens iter instituerat *Cnidum* , ubi teste *Sorano* insignis Observationum Bibliotheca conservabatur ; quam scrutatus est quam diligentissime . Coæ quoque , ubi natus , educatusque fuit , ex Templo ob collectiones observationum famigeratissimo ditissimam penum nactus est .

Hinc *Lib. de Diæt. in acut.* initio laudat eos qui Cnidas dictas sententias conscripferant ; opus quippe esse ab omni fallaci ratiocinio remotum , ex solius Naturæ severissimo desumtum observatu , tantamque simplicitatem redolens , ut quivis etiam Medicinæ ignarus illud rite potuerit conscribere , dummodo probe ex unoquoque ægro , quid patiatur , intellexerint . Reprehendit eos tantum quod segniores fuerint ,

quam

quam ut ex hoc præclaro opere Regulas prædicendi euderent quodque ex hisce ad alia non ratiocinarentur. Et *Lib. I. de Diæta*, ait se quædam scribere debere circa victus rationem, quæ prætermissa de veteribus; verum simul plura scripturum se eodem, quo veteres, modo; quippe quæ tam bene ordinata congestaque, ut aliter, atque illi, scribere nequeat. Ac maxime veterum monumenta laudat *Lib. de pri/c. Med.* Ubi errasse in multis afferit eos, qui Medicinam compendiosius tractaturi, ex calido, humido, frigido, sicco, explicare Morborum conabantur mortisque causas. „ At vero in Medicina, inquit, jam pridem omnia subsistunt, in eaque principium, & via inventa est, per quam præclara multa longo temporis spatio sunt inventa, & reliqua deinceps inveniuntur, si quis probe comparatus fuerit, ut ex inventorum cognitione ad ipsorum investigationem feratur. Imo tanti fecit hæc observata ut ibidem audacter pronuntiet: „ Qui vero his omnibus rejectis, & repudiatis, aliam inventionis viam, aut modum aggreditur, & aliquid se invenisse jactitat, is cum fallitur, tum alios fallit. Neque enim istud ullo pacto fieri potest.

Verum nondum contentus infinitæ indaginiis & diligentiae Vir, voluit observatorum veritatem in sua non tantum Patria, eique affinibus Regionibus, sed & in distantissimis experiri: cui

cui negotio, cum unas impar esset, filios discipulosque quaquaversum misit. Sic in oratione *Thessali Hippocratis* filii ad Aram misit *Athenis* habita legimus *Thessalum* a Patre in *Macedoniam* missum, *Dracontem* Thessali fratrem in *Hellespontum*, *Polybiun* cui filia Hippocratis nupserat, & reliquos Discipulos ad diversas urbes dimisso. Quibus redeuntibus, *Hippocrates* ex collatis ipsorum observatis cum fuis, & Majorum monumentis, scivit nec temporum sibi succedentium series, nec regionum distantiam, in confirmata tunc temporis praxi quid memorabilis mutationis attulisse. Vide eundem sub fin.  
*Lib. prænot.*

Hinc ipsius castissimam doctrinam omnium subsequentium sæculorum Medici obstuperunt. Vnde quando *Galenicis* argutiis, & acutis Peripateticorum argumentis fædata fuit Medicina hippocratica, hincque suo in progressu maxime impedita; quando invadente labens imperium Romanum Septentrionalium illuvie populorum, artibusque tunc temporis, & litteris fere omnino silentibus, per impuras deinde *Arabum* manus Medicina tradebatur, quando *Chemicorum* principatum in ea ambientium dira sub Tyrannide gemebat; quando dein *Philosophorum* posterioris ævi praxin pariter, ac theoriam iusta sua placita infringentium Legibus invita serviebat: semper cordati, candidique pectore Medici per omnes has ærumnas transiuntes, & artis

pis inconstantiam conquesti , vel ad Hippocraticam Disciplinam confugerunt ; quam sequendo in rectum reduci se tramitem gavisi sunt ; vel opinionum variarum fatigati fallaciis Naturam ipsam empirice contemplando , & sequendo sedula observatione veram cognoscendorum curandorumque morborum viam invenerunt . Quam dein vel ipsis , vel aliis , qui eorum scripta legerant , cum Hippocrate conferentibus semper constituit Hippocratica doctrina genuina , & justa Naturæ confecta semitas esse .

Hinc Cl. Boerhaeuius in oratione habita de commendando studio Hippocratico . , , Alii quod „ unius , inquit , hic quid plurimum industria „ valeat exibet ; alii suis modo vident oculis ; „ hic multorum usus est acie ; cæteri per sin- „ gulos ægros ; hic per eorum agmina experi- „ menta fecit : Pauci quid intra arcta unius ur- „ bis pomeria morbi sit , tradiderunt ; Illæ quæ „ in tot Vicos , Vrbes , Regiones , & Regna Lues „ grassaretur , observabat . Hanc ego causam , „ quominus alias huic pares statuamus , in pri- „ mis magnam puto . Profecto sapientia Artis „ major longe in illo fuit , qui tantis ad Me- „ dicinam auxiliis usus est , quam in Reliquis ; „ qui quamvis cætera æquales his destituti fue- „ runt . Atque inde natam arbitror eorum , „ quæ scripsit , æternitatem ; hinc ortam puto „ illorum quæ XXIII. Sæculorum examen su- „ stinuerunt , integritatem . Evolvatur illorum „ Or-

„ Ordo , mutata Hippocraticæ veritatis facies  
 „ nullibi apparebit . Excutite Grajos , cognosci-  
 „ te Romanos , versate Arabas , repetitam  
 „ atque confirmatam ubique invenietis doctri-  
 „ nam *Hippocratis* . Ex his enim quorum ad  
 „ Nos memoria pervenit . . . quidquid habent  
 „ eximii illi debent .

Eleganter sane paucis hisce stabilivit verbis ,  
 quidquid de *Hippocrate* dici queat , Clariss. Vir ,  
 ad urnam usque mihi colendus ; veramque , at-  
 que unicam viam præmonstravit , qua genui-  
 nam Tyrones erudiantur Medicinam : cuius pro-  
 fecto viri testimonium apud omnes æquos re-  
 rum æstimatores , gnaros quantum in Medicina  
 boni præstiterit , sufficiens videri possit . Atta-  
 men ab hominibus cætera ingeniosis , minus ta-  
 men Medicis , facile prævideo mihi objectum  
 iri id , quod *Cicero* in sæpius laudato opere de  
*Nat. D. lib. I.* „ Non tam auctoritates , in-  
 „ quit , in disputando quam rationis momenta  
 „ quærenda sunt . Quin etiam obest plerumque  
 „ iis , qui discere volunt , auctoritas eorum ,  
 „ qui se docere profitentur . Desinunt enim  
 „ saum judicium adhibere ; id habent ratum  
 „ quod ab eo , quem probant , judicatum vi-  
 „ dent : Nec vero probare soleo id quod de  
 „ Pythagoreis accépimus ; quos ferunt , si quid  
 „ affirmarent in disputando , cum ex his que-  
 „ reretur , quare ita esset ? Respondere solitos :  
 „ IPSE DIXIT . IPSE autem erat PYTHA-  
 „ GO-

„ GORAS. Tantum opinio præjudicata poterat, ut etiam sine ratione valeret auctoritas.

Cui quidem objectioni prægressæ Historia Hippocraticæ Veritas satis respondit abundeque, ut tamen hoc mihi oggerentibus, & aliis quoque consuluisse videar; tum quia vel sponte mihi volupe fit *Hippocratis Discipulorum* vel sola retexuisse veneranda nomina; en seriem clarorum in Arte Virorum, qui idem de Hippocrate testati sunt.

Luculentius testimonium non datur quam magni *Thomæ Sydenhami*, qui Angliæ simul, & totius Medicinæ decus insigne atque ornamentum fuit. Tantus ille Vir fluctuantem scolarum disciplinam, lugendaque, quæ hic oriebantur infortunia persentiscens, nihil ab aliis inquirere, legere nihil voluisse, sed sedulo tantum Naturæ studio summa cum prudentia, & indefessa sedulitate dedisse se fere videretur, nisi ejusdem opera hinc inde aliud forte indicarent. Ut ut se res habet, saltem videtur, ac si nihil legisset Naturæ in Clinicis contemplandæ multos impendisse annos, ut pag. 4. opin. omnedit. Leyd. in præfatione testatur ut & alibi pluries. Quantum autem in Re Medica præsterit Vir ille, supervacaneum hic retulisse foret; siquidem, & scriptis, id & ore fateantur quotquot in arte existunt boni. Aliquantum insenescens jam, & praxi inveteratus Acutorum

borum historiam methodumque curandi edidit ,  
 in qua in omnibus non tantum locis Hippocrate-  
 tem , qui veras artem colendi Regulas tradide-  
 rit , secutusque fuerit , fere unicum agnoscit .  
 Hunc ait Medicorum *Romulum* basi huic suam  
 superstruxisse doctrinam Νέστων φυσιες μητροες  
 ( qui locus præprimis ex VI. Epid. desumptus )  
*Morborum Medicatrix Natura est* : quibus id  
 egit „ ut morbi cuiuslibet Phænomena aperte  
 „ tradiderit , nulla hypothesi adscita , & in  
 „ partes per vim adacta . . . . atque in his  
 „ fere stetit magna illa divini senis Theoria ,  
 „ non ab irrito lascivientis Phantasiæ conami-  
 „ ne desumpta , ceu vana ægrorum in somnia ,  
 „ sed legitimam exhibens historiam earum Na-  
 „ turæ operationum , quas in hominum morbis  
 „ edit . Cum vero dicta theoria nihil esset a-  
 „ liud , quam exquisita Naturæ descriptio , par-  
 „ erat omnino , ut in praxi eo tantum colli-  
 „ maret , ut Eidem laboranti quibus posset mo-  
 „ dis subvenire contenderet : unde etiam non  
 „ aliam arti demandat Provinciam , quam ut  
 „ deficienti Naturæ succurrat effrænam coer-  
 „ ceat , & in ordinem redigat . Utrumque vero  
 „ hoc tum passu illo ; tum etiam Methodo ,  
 „ quibus Natura , morbum expellere satagit , at-  
 „ que amovere . Animadverterat nempe saga-  
 „ cissimus Vir quod sola Natura τας νοτας κρι-  
 „ νει , και εξαρκεει τα παυτα πασι . Atque haec  
 „ omnia peragit Natura paucissimis , simpli-  
 „ ciss-

„ cissimisque adjata remediorum formulis ; ali-  
 „ cubi etiam prorsus nullis . Vide *Præf.* pag.  
 „ 19. 20. Et iterum pag. 22. veram meden-  
 „ di methodum stabiliens . „ Quæ vero fundi ,  
 „ inquit , nostri est calamitas , jamdiu ab anti-  
 „ quissimo , & peritissimo Duce *Hippocrate* ,  
 „ & prisca medendi methodo , causarum con-  
 „ junctorum ( utpote quæ certo se prodant )  
 „ cognitioni superstructa descivimus : unde est ,  
 „ ut quæ hodie exercetur , a Logodædalis con-  
 „ fecta , contabulandi magis sit ars quam me-  
 „ dendi .

Dein in Epistola ad *Pammamum* pag. 326.  
 loquens de edendo suo in Chronicos commenta-  
 rio „ Singuli , ait , me dies docent , quam sit  
 „ arduum cæptum id ; & quam periculose ple-  
 „ num aleæ . Cum apud scriptores rei medicæ  
 „ ( *Divinum Hippocratem* , sidemas , atque alios  
 „ paucissimos numero ) vix ulla deprehendi  
 „ queant vestigia , quibus adjutus iter faciam . „  
 Ac rationem esse subjungit , quia quidquid plu-  
 res promittunt , sunt tantum ignes fatui , non  
 veræ faces hypothesibus superstructæ quas la-  
 scivientis Ingenii , & Phantasie Luxuria pe-  
 rerat .

Objicere contra quis posset *Sydenhamum* , ut  
 ut *Hippocratem* extollit , tamen invenisse quod  
 sæpe alia longe ab Hippocratica sit ineundem  
 via ; siquidem fateatur se vehementi desiderio  
 Methodum certiore , minusque lubricam expi-

scandi , & stabiliendi *in semitas nullo ante pede calcatas* per tractum fuisse .

Verum jampridem dixi Sydenhamum , vel non legisse auctores , vel quod probabilius , auctores quidem legisse , tamen quia forte omnibus diffidebat , quasi legisset omnino nihil , in ipsa praxi a principio ad finem ab ipsa eaque sola natura edoceri voluisse . Hinc mirum nihil , quod testetur se *in semitas nullo antea pede calcatas* pertrahi ; cum auctores negligens ne sciverit , aut potius nescire voluerit , quasnam umquam semitas calcaverant Medici . Unde id saltem patet , quod in praxi aliquando minus forte hæsitaasset , si hippocratica semper p̄æ oculis habuisset . Quare is , qui s̄æpius conquæstus fuerat fastidiosam in morbis varietatem , viresque , & ætatem ad perferendos labores in invenienda cuique propria curandi Methodo prorsus imbecilles ; postea in *scedula monitoria de nove febris ingressu* , pag . 538 . quæ ex ultimis Viri operibus est , testatur quamplurimarum specierum febribus certa quadam & unica methodo posse mederi , scilicet qua missa sanguinis subeunis purgatio opio sedetur . Ut profecto teste ipso in arte jam confecto , & insenescente pauci morbi fuerint ad quarum curationem per *semitas nulla antea pede calcatas* pertrahi medentem oportuerit .

Quin & is , qui in Epistola ad Doctiss . Th . Short dixerat sic a natura se comparatum , ut quod

quod temporis alii libris legendis , id ille omne meditationi impendere soleat ; neque tam inquirere , an sibi assentiant alii , quam quidem utrum quæ ipse tradat cum veritate consentiant ; cui etiam occanebatur .

*Sic te scientem non faciunt Libri  
Et dogma pulcrum : sed sapientia  
Enata rebus . Mensque facti  
Experiens , animusque felix .*

Idem , inquam , ille confitetur postea palam quanto ipsi detrimento hoc fuerit , dum in Epistola ad Godartium scribit „ Licet XXX. an- „ norum , & quod excurrat , spatium , quibus „ ego non indiligenter in morborum observa- „ tione versabar , sufficere posse videatur , ad „ majorem , quam in ipsorum cognitione feci , „ profectum faciendum ; attamen haud temere „ affirmo . Quod . . . . ne quadruplicatus qui- „ dem horum annorum numerus , etiam in ho- „ mine occupationibus Medicis distractissimo , „ satis erit ad eundem in omni Medicæ artis , „ quaqua patet , circuitu , rite perficiendum .

Nec mirum sane quod pro eo , quo erat , candore fateretur hocce : quandoquidem supra satis superque ex Hippocratica Historia consti- terit quantæ molis erat Medicam condere Ar- tem . Quod profecto Medico cuivis impossibile . Quin , & Medicinam cum unoquoque Medico renasci velle , haud minus foret absurdum , quam velle Nauclerum quemque solo observatu-

discere, & indefessa indagine expiscari oportere Astrorum fixorum errantiumque Doctrinam, iusta quam navim dirigeret; & nauticam acum vimque, qua donatur, magneticam, Geograficas quoque Tabulas, quæ Regiones quo pergen- dum, quæ scopulos evitandos rupesque indigi- tent. Sane millena prius naufragia, evoresque contingenter, quam ruditis quisque homo *Palinu- rius* fieret.

Quod si forte longorum annorum erroribus, & periculis captis tandem aliquis superstes, horum plurium in cognitionem veniret; nauticæ artis imperitis constaret, arbitror, quanta cum certitudine ars illa hucusque culta foret. Quod cum in *Sydenhamo* contigerit, qui *Hippocrati* laudando longe imparem se fassus est, quia Doctrinam ipsius divinam perpetuo ille obser- vat u confirmatam stabilitamque cernebat: qui- que errasse pluribus Operum suorum locis scri- bit quotquot ab *Hippocrate* descriverant: qui denique asseverat Medicinam, qui bona atque unice vera via in morbis cognoscendis, & cu- randis processit, *Hippocrati*, vel superiorem, vel parem habuisse neminem: abunde convinci- mur inconcussæ Hippocraticorum firmitatis, futuræque in clinica praxi felicitatis, si quis Hip- pocratica disciplina probe instructus, ad illam se se accinserit.

Doctiss. *Foesius* eruditus in *Hippoc.* com- men- tator in præfat. ad *Lib. Epid.* maxime ad  
*Libr.*

*Libr. I. III.* Sæpius conqueritur Hippocratica tam parum medicorum volvi revolvique manibus; *Hippocratem* veluti solem esse cuius plerique adspectum non ferant, quia „*Hippocrates*, ait, natura admirabilis est, genere toto „gravis, artis complexione insignis, clarus, „præceptionum comprehensione infinitus, ver- „borum ornatū grandis, interdum pressus, con- „cīsus sententiis creber, & sapiens, compre- „fīone rerum brevis, & ob eam ipsam cau- „sam obscurus. Doctrinam vero ejus in 1. & „3. Epidem. *Libr.* ita laudat „ut ex hoc, „veluti *Hippocratis* opere medico curationum artem, tanquam suppellatīlem tibi adornare sit facillimum, p̄fīsque his instructus per media ægrorum triclinia tutus, & integer omninoque admirabilis, veluti *Caducæo* ornatus, oberra- re.

*Duretus* ingens illud Galliæ lumen in *Coacis Hipp.* fol. 267. „Fremant, inquit, licet „omnes, dicam tamen quod sentio, majorem „scientiæ, & praxeos ubertatem comparari a „studio *Hippocratis* uno die, quam ab istis „pragmaticis uno saeculo.

*Georgius Baglivius* Professor Romanus ob singularem eruditionem atque Hippocraticum Studium Clarissimo *Hottono*, olim in hacce Academia medicinæ & Botanices Professori, singulari litterarum commercio amicissimus, præcipuisque Angliæ, Galliæ, Germaniæ, Italiæ medi-

cis acceptissimus, idem de *Hippocrate* judicium  
tulit. Videatur Tractatus ejus *de Fibra motri-*  
*ce Clementi XI.* Pontifici Romano dicatus, plu-  
ribus in locis, ac præsertim §. 1. in *Practi-*  
*cen novam*, ubi in præfactione tractasset de me-  
thodo Neotericorum, „ cùm igitur, inquit,  
„ compererim hac via me numquam ad opta-  
„ tum exitum per venturum, missis cæteris libris  
„ totum *Hipocratis* me studio tradidi, aliquam  
„ bene medendi rationem inde assequuturus. Et  
„ cùm eum non semel relegisse & prope me-  
„ moriæ mandasse, proprio marte volui in  
„ Italiae Nosocomiis dictorum illius periculum  
„ facere, nec sine admiratione deprehendi Do-  
„ strinæ illius veritatem tamquam ex Tripode  
„ prodeuntem. Cognovique illum demum esse  
„ verum artis medicæ Ducem, magistrum, &  
„ auspicem: diuque hanc veritatem expertus  
„ liquido cognovi raro illum in ægrotorum cu-  
„ ratione aberraturum, qui omnes *Hipocratis*,  
„ textus memoria comprehenderit, deinde nove-  
„ rit illos simul componere, compositosque con-  
„ ferre ad curam; in quo certe tota praxeos  
„ sapientia consistit ... Hæ sunt deliciæ *Hip-*  
*pocraticæ* quarum epulis soli fruuntur, & sa-  
„ turantur, quibus discendi studium est ab uno  
„ *Hippocrate*: cuius quidem quælibet sententia,  
„ veluti Senatus Consultum, litem componit  
„ in arduis morborum curationibus.

Idem in Epist. ad N. Andry, medicum Pa-  
ris.

ris. med. Lect. , ac Profes. Reg. Sic scribit  
 „ Je suis ravi de voir par votre Lettre , qu'  
 „ en ce tems , ou la medicine est comme sur  
 „ le point de perir , par les speculations , &  
 „ les hypotheses , dont on l'accable , il se trou-  
 „ ve en France des esprits eclaires , qui vo-  
 „ ient le danger qu'elle court , qui reconnois-  
 „ sent , que l'unique moyen de la conserver ,  
 „ c'est de fuir le faste des opinions , & de re-  
 „ courir a Hippocrate pour apprendre de lui ,  
 „ comme de l'Interprete de la Nature , le che-  
 „ min de la verite .

Doctiss. Pallilius in Epist. ad Bagliv. allo-  
 quens quosdam Hippocratis detractores , chemia  
 maxime infatuatos „ Nonne vides , ait quantam  
 „ sibi gloriam in tua Batavia ( Nostrum Le-  
 „ Mortium præcipue alloquitur ) comparaverit  
 „ omni ævo memorabilis Sydenhamus ? Ille er-  
 „ rores quamplurimum nostri sæculi medicorum  
 „ detegendo seque Hippocratis præceptis ad-  
 „ dicendo , praxim medicam a nebulonibus de-  
 „ turpatam ornavit , defendit , restituit . Quam  
 „ non famam sibi peperit in Galliis . . . Du-  
 „ retus omni æternitate dignus , quod Hippo-  
 „ cratem tam bene intellexerit & illustraverit ?  
 „ &c.

Infinitus ero si omnes , qui hoc modo de *Hip-*  
*peccates germanisque ejusdem Discipulis locuti*  
*sunt , Auctores retulerim . Pauca ex his delibas-*  
*se sufficiet , quæ abunde evincunt quantus in*

medicina facienda *Hippocrates*, qualisque fuerit.

Quibus ita stabilitis vel sponte cadunt, quæ in Praxeos exercendæ inconstantiam afferuntur, cum XXIII. Sæculorum examen demonstraverit Praxeos unam esse modo methodum, quæ observata religiosius prosperos, neglecta vero finistros dedit effectus. Unde videor defunctus officio respondendi ad hanc secundam Theoseos objectionem. Verum ut ipso opere demonstrem quid Hippocratica veritas cunctis præstet opinionibus, unum atque alterum exemplum afferam rerum earum quæ maxime in disputationem cadunt, quæque præcipue in medicorum proferuntur opprobrium; quorum alterum **MIS-SIONEM SANGUINIS** spectabit **DIÆTAM** alterum.

Primo itaque objicientes in medicinam audiimus sæpe claros aliis in disciplinis viros, quod noverint medicos complures, missione sanguinis ubique fere utentes, alios eam ubique fere improbantes; eandem frequentius alios usurpantes, rarius alios; nonnullos vidisse se, ajunt, qui gauderent quod in acutis per M. S. & purgantia ægros in debilitatem extremam conjecissent, alios iterum, qui eam licet vicibus crebram, tamen copia pauciorem instituerent. Recensent nobis nationes integras, quarum aliæ minus magis aliæ in M. S. inclinent. Temporum meminerunt quibus paucos, temporum quibus plurimos,

rimos, se adhuc viventibus, venæ sectio narciscetur patrōnos. Quibus pathetice recensitis vel in diversas diversi sententias, quo fundamento ipsi viderint, abeunt; vel stabilem Medicinæ Basin esse præfracte ne-gant.

Sane M. S. plurimos lethi e faucibus eripuit, & sanitati reddidit: verum cum aliis egregiis sanitatis, aut conservandæ aut restituendæ administriculis tristem hanc sortem subiit, ut, quia saepius prodeesse visa, ubique fere convenire de-prædicaretur. Hinc tandem mortalibus ingens hominum caterva per M. S. interire animadversa. Proximum erat ex his oppositis observatis animum acuere, ut tandem quibusnam in morbis, aut quonam morborum in stadio, aut quibusnam subjectis profuerat, nocueratve distingueretur ut pag. 24. dixi castos illos naturæ observatores primævos mortales fecisse. Verum ut plerumque fit in rebus humanis, quod qui opinionem reprehensione dignam reprehensurus sit præ vi disputandi, ceu rapido flumine abreptus, in oppositam plane sententiam, non minus priore a vero aberrantem, abeat; sic magna cum hominum pernicie in medicina contigit: dum medici noxas ex intempestiva M. S. natas condemnaturi, eandem propemodum prescripserunt. *Dum vitant stulti vitia. in contraria ruunt.* Nam & qui M. S. numquam fere non laudant, & qui eam ubique vituperant, ut & omnes qui ex præjudicata opinione in eandem minus, vel quimium

nimum inclinant æquæ infortunato cum successu utriusque agunt. Æterna scilicet observata, quæ collegit, tradiditque *Hippocrates*, quæque *Aretæus Cappadox*, & quotquot casti Naturæ observatores in huc usque diem extiterint, confirmarunt absque exceptione ulla docent.

1. M. S. optimam uno in morbo, in alio pessimam esse.

2. M. S. in eodem morbo certa quadam institutam die, arcere mortem, quam alio die instituta accelerat.

3. M. S. ad certam copiam faciem curare integre; ad minorem copiam morbum accendere; ad copiam multo majorem ex acuto morbo producere Chronicotatum, qui hominem plures per annos excruciet.

4. M. S. ad eandem copiam, in eodem morbo, eodemque in morbi stadio celebratam ægrum unum Lethi e faucibus eripere, Letho aliud tradere.

Primam hancce veritatem innumeris observamus exemplis, ubi M. S. in morbo calido acuto inflammatorio sœpe cum maxime prodest: in languido inertis mucoso, plerumque obest. Hinc videoas *Hippocratem*, & quotquot ipsum sequuntur, M. S. instituere, vel omittere, prout horum alterutrum plus minus obnireat; cum in Acutis sœpe Naturam effrenam ad modermen ducere necesse sit, ubi eidem languenti, & inertis in Chronicis potius calcar addi oportet.

Quam

Quam praxim numquam satis laudandus confirmat Sydenhamus , qui tantas ubique laudes de M. S. canens . Eidem tamen pag. 84. multorum originem malorum adscribit ; imperitos Medicos perstringens qui V. S. Catharsi , & Regimine inepto suos ægros febre intermittentē vernali laborantes , ad extremam debilitatem ducebant , ita ut cum eadem in Autumnum usque conflictarentur , inque ipsam quandoque Maniam inciderent . Timetque quoque a V. S. in Tertianis autumnalibus , maxime si illa constitutio fuerit admodum Epidemica ; quia nisi febrim illico confodiat , solet illam quam pertinacissimam efficere , ita ut senes haud raro inde ipsam mortem subeant M. S. in Quartana autumnali adeo obesse censem , ut qui juvenes intra VI. Menses juxta earumdem febrium decursum liberati fuissent , adhuc per VI. alias menses eandem corriperentur ; ætate autem proiectiores longe adhuc pejus inde afficerentur . Videatur quoque hic loci *Tulpii Obsr. Med. Lib.* 4. cap. 52.

Idem *Sydemhamus* pag. 446. in Podagra docet V. S. licet in hoc morbo a multis , ut proficia deprædicetur , illum tamen immaniorem , atque frequentiorem reddere ; nec institui oportere , nisi forte per accidens . Ut v. g. quando patiens juvenis est , & immoda pergræcatione insigniter calefactus . Confirmavit id nuperimum exemplum Principis , qui cogens Medicos suos

suos aliquod ut excogitarent remedium , quo illico a Paroxysmo liberaretur , post M. S. aliquantis per liber fuit ; deinceps vero malum ita incruduit , ut qui antea bis in anno , dein omni forme mense paroxysmo vexatus fit .

Tamen hujus veritatis ignorat esse complures Medicos , non est quod inficias eam : quos *Moliarius* in Comœdia pulcre depinxit , veluti quibus in omni Morbo aliud vix agendum videtur quam *Saignare Clysterare , & Purgare* ; & si morbus sit pertinax , *Resaignare , Repurgare , Reclysterare* .

Dixi secundo M. S. in eodem morbo certa quadam die institutam , arcere mortem , quam alio die facta accelerat .

Sic in acutis febribus M. S. max initio facta , in corpore plethorico , robusto , juvenili , calidissimo , nullis adhucdum signis apparentibus quæ doceant in Resolutionem , vel Criticam evacuationem abituram Naturam , egregie juvat : Eadem instituta in eodem morbo die 4. finito , 5. 6. &c. hominem plerumque pessumdat . Sanguinem enim pauculum , qui in venis residens labentem vitam utcumque sustinebat jam educunt ; sanguine reliquo compacto , in arteriis hærente , nec revulsione , quam intendunt , juvando ; quin & Naturam fatali fere necessitate eo perductam ut in suppurationem , ceu unicam citi interitus evadendi viam , abeat , ita prosternunt , ut huic negotio plane impar redatur .

Ob-

Objicit quis ex ipso *Hipp.* contrarium apparere; si quidem ille *Epidem.* 3. pag. 1104. in *œgro octavo*, *Anaxionis* pleuritide sœva, & quidem sicca laborantis historiam tradens, ubi omnia notabilia symptomata ad sextum usque diem narraverat, subjungat: „ Fatus nihil profecisse, septima die moleste habuit; nam & febris intendebatur nec dolores remiserant, & tussis infestabat, & difficilis spiratio ine- rat. Octavo die seuerunt in cubito venam, multus sanguis, qualis debuit, effusit, dolores certe remiserunt . . . . 34. die sudore per totum corpus diffuso . . . . iudicatione absolu- tus est prorsus.

Resp. Ipsum *Hipp.* textum objectionem totam dilnere; cum ex eo patescat post inflammationem Laterum, primam subsequytam esse alteram priori non mitiorem. Quæ causa impellit nonnumquam prudentem Medicum, ut in hoc ancipiiti casu V. S. instituat ultra primum inflammatorium morbi stadium. Unde Foesius notat hoc veluti rarum quiddam ab *Hippocrate* notatum, quia veteres non solebant M. S. post IV. diem instituere.

Dixeram 3. *M. S.* ad certam copiam factam curare integre; ad minorem copiam morbum attendere; ad copiam multo maiorem ex acuto morbo facere morbum alium Chronicum, qui hominem per totam fere vitam excruciet.

Uno eodemque exemplo hujus triplicis propositi-

positionis membra probantur. In initio Febris acutæ inflammatoriæ sævissimæ, sanguis detractus, donec symptomata levari, & vires vitæ debilitari incipient, ex largo vulnere fluens sæpe sanavit ægrotum: sanguis detractus ad parvam quantitatem, ex vulnere parvo, febrim longe ferociorem, citiusque tenella corporis vasæ destruentem effecit: sanguis denique missus, donec symptomata omnia mitigata prorsus, vire que omnino prostratæ sint, homines reddidit languidos, & tota vita ineluctabilibus quandoque Morbis conflictantes.

Hinc sapiens ubique *Hipp. lib. de Locis in homine pag. 416.* tradens Curationem Peripneum, & Pleurit. recensensque compendio quæ aliis sparsim locis habet, religiose vetat febrim continuam per VII: dies omnino sedare, sed tantum, ne nimis ferociat, moderari jubet.

*Aretæus Cappadox in curat. Pleuritidis S. M.* tantum jubet ad Symptomatum Tolerabilitatem, neutquam ad eorum integrum cessationem. Ideoque *M. S.* repetendam potius esse semel pluriesve, si expedit, quam una vice Naturam omnino prosternere.

Idem in *Angina* vetat V. S. ad caloris febrilis integrum ablationem.

Mirum profecto quod *Sydenhamus* hanc item scribit pag. 124. in febre pestilent. & peste annor. 1665. 1666. Miris ibidem exemplis docet V. S. ad copiam debita minorem institutam

tam omnia mutasse in pejora , impedientibus scilicet ægrotantium necessariis crudeliter commiserantibus, ne fieret V. S. largior . Pejus propterea esse sanguis non satis , quam omnino nihil misisse : siquidem in teterrimo hoc morbo , non misso sanguine sudor provocari poterat , qui saepe pestem profligaverat ; misso vero paucō sanguine, provocari omnino non poterat : unde & hisce ægrotis pereundum fuit . Quæ eadem M. S. ad sufficientem missa , & repetita copiam , Tumoribus Pestilentialibus nondum apparentibus , erumpentibusve , felici Curatione beaverat ægrotantem . His vero binis neglectis Regulis , V. S. pessima quæque produxisse . Quam rem a plerisque ignoratam conqueritur magnus ille vir in causa fuisse ut *Diemerbroekius* aliique M. S. in Peste proscripterint .

Objicietur forte contra hanc 3. propos. ipsa *Sydenhami* auctoritas , M. S. tam copiosam in Pleuritide præscribentis , ut vires omnino prosterantur , & febris suffocetur plane juguleturque . Cur ergo is , inquiet nonnulli , non metuit ne Chronicos in Morbos ægrotantes coniceret ?

Respondeo *Sydenhami* methodum hac saltem in parte bonis atque confectis in arte Viris minus probari , utpote qui testantur saepe ortum hinc se vidisse id quod immortalis *Hippocrates* Vates prædixerat : atque hoc ipsum testari quantæ molis sit Medicinam cum unoquoque Medi-

co renascentem velle ; quandoquidem ingens alioqui *Sydenhamus* hac in parte minus rite processerit . Qui si Hipp. legisset , aut saltem ut *Ducem* secutus esset, procul dubio felicius *Pleuritides* sine insequenti *Naturæ* languore curavisset . Vid. pag. 26.

Quarta propositio est hæc : *M. S.* ad eandem copiam , in eodem morbo , eodemque in morbi statu peracta , uni prodest , obest alteri sumnopere . Triplici modo hæc propositio vera est .

1. Ratione apparentium evacuationem .
2. Ratione causæ morbi .
3. Ratione subjecti .

Quoad primum , exemplo sit *Peripneumonia* . *M. S.* facta in statu inflammatorio , nullis adhuc dum signis evacuationis naturalis , aut resolutionis , conspectis , morbum sæpe jugulavit , hominemque reddidit sanitati : Alium vero hominem in mortem , ejusve saltem in ingens periculum conjecit , dum celebrabatur eadem , qua in priore , & copia & morbi die ; ubi Natura jam cœperat per bona sputa , aut per urinas , aut per alvum materiem morbificam ad exitum preparare , aut & re ipsa eliminare : Quæ in hoc suo negotio evacuantibus impedita , ceu telo confossa succumbit .

Hic juvabit adnotasse quomodo *Cl. Petitus* Paris. Medicus in suis eruditis ad *Aretæum Cappadocem* Commentariis in cap. de curat. peripn. mira-

mirari satis , & secum concoquere nequit V. S. ab *Hippocrate* prætermissam fuisse eo maxime in loco ubi hujuscē Morbi curationem tradit ; laudat vero *Aretæum*, quod illīco in hoc morbo M. S. instituat.

Verum quid istuc rei est ? Magnus *Hipp.* consueverat Morbi curationem cujuscumque sic describere , quemadmodum ab ipsa curari Natura sæpe observabatur ; sive per benignam Resolutionem , sive per Criticam evacuationem , ut per sputa , per alvum , per urinas , per hæmorrhagias varias &c. sive per bonam metastasis . Medicum vero vocat Θεραπευτην id est Ministrum , cuius tantum est Naturam , an salutarem sibi viam paret , e propinquo observare , eique , si viam bonam affectans debilior existat , opem ferre . Hinc sæpe Missionis sanguinis in *Peripn. Pleurit.* aliisque inflammatoriis morbis ne vix quidem meminit . *Aretæus* autem *Cappadox* traditurus Curationem horum Morborum , ponit Medicum ad primordia mali statim accersitum : quando de morbo jam constat , nullis adhuc dum resolutionis vel criticæ evacuationis indiciis apparentibus ; quo in casu M. S. periculo egrum eripit .

Hinc *Hipp.* generalem regulam statuit , juxta quas evacuationes omnes institui oportet Lib. 3. de *Morb.* pag. 488. iubet enim ibidem alvum , non purgare , sed lenire , primis

diebus invadentis Pulmonum, Laterum, Capitisque inflammationis. Sed illud *Lenire alvum* jubet magna fieri cum circumspectione. Si enim multum per alvum secedat, mortem, ait, post diem v. affore. Quid ita? Quia Natura curationem molitur per evacuationem morbi genio convenientem. In *Peripn.* & *Pleurit.* plerumque per sputa bona satisque copiosa „ Secedente autem per inferiora humore „ superiora siccescunt, neque sputum per su- „ periora repurgatur. „ Quæ ergo meta agenti? „ inferiorem igitur alvum neque ni- „ mis fisti oportet, ut ne febres increscant; „ neque nimis dimitti, ut sputum sursum di- „ mitti possit, utque æger viribus valeat „ Idem paulo post in Fleuritide repetit, ex hoc exemplo simul intelligimus cur sapiens ille Naturæ observator omnes omnino evacuationes prohibeat.

Neutquam ergo hi Magni Medicorum Parentes *Hippocrates*, & *Aretæus* contrariam curandi tradidere Methodum.

Quod eo evidentius patescit, siquidem & ipse *Hipp.* descripturus officium Medici, qui ad ægrotum hujusmodi accersit, crudo omnino existente adhuc morbo, Rem eodem, quo *Aretæus* modo exordiatur.

Sic *Libr. de rat. Vict. in acut. generalem regulam* cudit; quam juxta Medicus agat, diceendo „ In morbis acutis sanguinem detra- „ , hes

„ hes „, qua lege? „ Si vehemens fuerit mor-  
bus, & qui ægrotant ætate florenti fuerint,  
„ & virium, robore valuerint „. De sputis,  
alvo, urina, &c. non dixerat, utpote de his  
agens, in quibus horum appareat prorsus ni-  
hil.

*Lib. de affect. intern.* In varice pulmonis  
cum tussi sicca, rigore, febre, & orthopnoea  
jubet M. S. iterum eadem de causa.

*Lib. de diæt. in acut.* Jubet in Angina, si  
vehemens causa hanc inflammationem fecerit  
sanguinem illico mitti; quam M. S. *Lib. de  
locis in homine* ex Raninis instituit venis, &  
ex Brachio præcipit.

*Lib. 3. de morb. in volvulo*, seu ileo ubi  
suminis illico antiphlogisticis Naturæ succur-  
rendum est M. S. commendat.

Evidenter iterum *Lib. 1. de morb. in Pleu-*  
*rit.* & *Peripn.* jubet M. S. sed qualibus? sic-  
cis; ubi nullas affectatas a Natura vias cer-  
nit medicus.

Iterum *Lib. de diæt. in acut.* loquitur de  
V. S. vel alvi solutione instituenda in Pleuri-  
tide quando dolor manet continuus, ad calida  
fomenta nihil remittens, nec sputa minime pro-  
deunt.

Objici contra posset M. S. &c. præcipi ab  
*Hipp.* etiam præsentibus sputis *Lib. de diæt.  
in acut.* pag. 401.

Sed addit disertis *Hipp.* verbis sputa ab iis

aliena quæ apparere consueverant , imo talia quæ semper Medicis damnantur „ si sputa , „ ait Rufa , aut Livida , vel etiam tequa , „ spumosa , & florida „ sputa nempe talia quæ nedum levant morbum , sed quibus prodeuntibus morbus formidolosius insurgit.

2. *Ratione causæ morbi nomine ejusdem* , *propositio hæc quarta vera reperitur.*

Sic Hipp. *Lib. de affect. intern.* in tradenda curatione doloris Ischiadici , ejusdemmet morbi diversas intuens causas quarum altera frigida , calida altera est , nullam M. S. mentionem facit in curando dolore Coxario a Pituata orto : mox vero ubi ad eundem dolorem ex sanguine ortum sese convertit , M. S. imperat cum fomentis .

*Aretæus Cappad. de curat. acut. lib. 2. cap. 5.* commendat V. S. si volvolus ab inflammatione ; eandem vero condemnat , si a causa frigida , vel a corruptione ortus fuerit .

*Sydenham. pag. 101. 102. 103.* M. S. prescribit ad certam modo copiam in mania , orta ex inveterata Melancholia , & atra Bile ; si vero in mania ab evacuationibus , & debilitate nata instituatur , furorem , dicit , ad tempus demitti aliquantulum , sed tamen multipli- ci observatione constitisse quod post M. S. in perpetuam , ac prorsus incurabilem fatuitatem versa sit .

Denique obtinet hæc *propositio ratione subiecti.*

Hipp.

*Hipp. Lib. de rat. vicit. in acut.* ut mox  
ante jam recensui, „ in acutis sanguinem de-  
„ trahes . . . . si ægrotantes ætate florenti  
„ fuerint, & virium robore valuerint.

*Aretæus de curat. Lib. 2. cap. 2.* jubet M.  
S. in sanguinis per pulmonein sputo ; sed ea  
lege, ut id non fiat, si æger tenuis, & san-  
guine inops sit.

*T. Sydenham pag. 54.* sanguinem neuti-  
quam misit in pueris vel senibus, vel etiam  
in junioribus, diurno antea morbo confe-  
ctis, ut *pag. 60.* ait, dum in eodem ipsissi-  
mo morbo principem, ac primum locum Phle-  
botomiae tribuebat, si corpora essent robusta,  
athletica. Didicerat nempe fidelis ille Naturæ  
Discipulus, si phlebotomiam his imperaret  
„ quod sanguis etiam num citra ejusmodi im-  
„ minutionem plus satis debilis suæ despuma-  
„ tioni obeundæ prorsus impar redderetur.  
„ Unde totius massæ perversio, ac proinde  
„ forsan ipsius ægri interitus sequeretur. . .  
„ Quamquam, pergit, haud me latet ægros  
„ temeraria S. M. multatos convenientium car-  
„ diacorum usu aliquando servari, sangu-  
„ nemque ad tenorem defæcationi suæ pera-  
„ gendæ idoneum restitui posse. Sed præstite-  
„ rat plagam non infligi, quam sanari.

Attamen, ut dixi, in eodem illo morbo in  
Athleticis corporibus Juvenum, in tempera-  
mentis sanguineis ait V. S. sine salutis perieu-

lo omitti non posse; qua omissa viderat Pleuritides oriri, Phrenitides, aliosque morbos.

En primum exemplum doctrinæ Medicæ, in tantam apud Medicos disceptationem venientis, tam simplicis, tamen evidentisque, ut miremur *Helmontium*, *Botallum*, aliosque in tantam ea super re sententiarum discrepantiam abiisse: cum Hippocratica, idest, justa ipsam directa Naturam doctrina, tam nitide tamque accurate rem totam sic extra omnem disputationis aliam collocaverit, ut quid amplius circa eam dubites invenias prorsus nihil.

ALIA nunc tractanda venit disputationis materies de *Diæta* scilicet, seu *victus ratione*, cum sanis præscribenda, tum ægris. Quam circa rem Litibus inter se Medici, vah quantis! belligerantur. Ut putem hoc maxime ex capite se ridiculos exhibuisse. Raros quippe præter Hippocraticos reperias quorum ab altero alter non discrepet. An forte quia tantis per se involuta latebris res sit? Certe Hippocratica adeunti tanta rei, ut prorsus stupeat, simplicitas apparent; mirarique quod hic ita cespitent multi, satis nequeat.

Diætæ præscriptio tanti habita *Hippocrati* fuit ut in sua jurandi formula juss erit jurare Medicum „ se *victus rationem*, quantum facta cultate, & *judicio consequi poterit*, ægris „ utilem præscripturum „. Quam rem jurejuringando confirmandam etiam Academiæ hujus Pro-

Proceres religiose velint. Sane videmus hanc tanti duxisse veteres ut de ea potius , quam de formulis concinnandis agant , rati nimirum bonam victus rationem tantum , si non plus , quam pulvulos , pilulas , aliasque laudabiles ex Pharmacopæa desumptas præparationes , ad morborum curationem conferre . Unde pulcre Hipp. scribit *Lib. de Arte* „ Si in re medica , aut apud Medicos Curatio ex purgantibus aut sistentibus Medicamentis tantum constaret , parum efficax esset nostra oratio . „ Nunc vero qui inter Medicos maxime celebantur , & victus ratione , & aliis etiam modis curationes faciunt ; quæ non Medicus modo , sed ne plebejus quidem omnino rudi dis ex arte profecta esse negare audeat .

Acturus idem *de Diæta agrorum in acutis* , Libro auro contra cariore , putat vel hinc boni Medici utilitatem , necessitatemque patescere . Absque studio enim Medico sciri posse a quopiam , medicamenti , aut alterius rei , V. C. Ptisanæ virtutem ; sed absque studio Medico ignorari , quomodo revera sese habeat morbus , quomodo danda sit Ptisana &c. qua forma , quo die , quo ve diei tempore .

Quæ cum absque niedico studio sciri nequeant , magnus ille vir ortos hinc credit eorum errores , qui absque seria indagine rem pro imaginationis ludibrio definientes circa

omnia hæc capita in varias varii sententias abiverant.

Hinc , ait , artem ipsam vituperari nulla quasi esset , cum quod unus exibuerit Medicus , alter id damnet . Vulgus hinc primum ut credat artem totam nil nisi speciem divinationis esse ; quia divinatores , haruspices , auguresque ita inter se se digladiari vident . Huc usque *Hipp.*

Veniamus nunc ad Diætæ in acutis examen .

Quæritur 1. An alendus sit æger ? Affirmative *Hipp.* respondet . Quippe Bilis ipsi ubique multorum in acutis malorum origo est , quod experientia nunquam non confirmat : Si Bilis nil invenit , in quod agat , terribilia prodit symptomata . Vetus quoque Chylus humoresque omnes longo repetitoque circuitu acriores furent , suaque , quibus continentur , vasa destruunt , ni novo Chylo , ceu Balsamo , mitigentur .

Quæritur 2. Quid sit dandum ?

Censet *Hipp.* Ptisanam , seu Hordei decoctum omnibus anteferendum aliis in acuto morbo . Cum nunc boni practici advertant opus esse cibis potibusque fluidis , facile digerendis , putredini adversis , siti contrariis , causæ morbi cognitæ oppositis ; non datur aliquid Ptisana melius , hisque dotibus ditius ; maxime si cum grato quodam acido misceatur . Decocta panis &c.

&c. *huc quoque referuntur, quæ forte priore minus flatulenta.*

*Quæritur 3. Quandonam dandus cibus?*

*Resp. Hipp. lib. de Diæt. in acut. ut in pluribus aphorismis, quod mox latius patebit, eo dandum tempore, quo febris vel abest, si intermittat; vel lenior est, si remittat.*

*4. Quoties dandus?*

*Resp. Hipp. ibidem semel vel bis in die, prout æger dum sanus existebat consueverat. Liceat hic cum pace Manium Hippocraticarum dicere, Europæos saltem Medicos diuturno rerum usu observatuque didicisse, quod minori copia, sed magis repetita, præstet cibos exhibere: cum viscera vi morbi debilitata vel turbata nimia copia simul sumta graviter laborarent opprimerenturque.*

*5. Qua vi, & copia, singula vice?*

*Hic tandem Hippocratica elucefecit sapientia. Vult enim primo consideret Medicus quantum temporis sit duratura febris: adeoque totus est in signis, quæ hoc doceant, tradendis. Hac re occupatur toto Libro de Crisibus huic innixus Regulæ. „ Crisum, quæ brevi „ meliorem fore statum portendunt, eadem „ fere sunt, quæ sanitatis signa. Hinc libro „ hoc citato, libro de Diebus judicat. de Coa- „ cis prænot. in Epidem. in Aphor. &c. „ ju- bet Medicum attendere ad omnia, quæ in æ- gro plus minus a statu sano recessere, idque in*

in actionibus omnibus vitalibus , naturalibus , animalibus .

Hinc libro *de dieb. iudicat.* , , Magnam artis , inquit partem esse duco , posse , quæ recte scripta sunt speculari . Qui enim hæc noverit , iisque utitur , is mihi in arte non multum falli videtur . Unamquamque sane tempestatum anni , & morborum conditionem exacte addiscere oportet , & quisnam morbus bonus , quis periculo conjunctus , aut in temporis conditione , aut in morbo , quinam morbus longus sit , & lethalis ; longus quinam salutaris ; acutus quinam lethalis , acutus quinam salutaris . Ex quibus tum judicatoriorum dierum series contemplanda est , tum etiam prædicendi facultas suppetit . Præterea que ex his , quibus , & quando , quamnam victus rationem præscribere oporteat cognoscere licet .

*Aphor. 1. n. 12.* docet Medicum quo pacto exacerbationum varietate , & temporis conditione , & excretionibus variis melioribus vel pejoribus citius , vel tardius apparentibus hoc agnoscat . Præcipuum in hisce fundamentum desumit a diebus indicatoriis , vide *Aphor. 2. 24. 4. 36. 4. 71.* Quorum omnium exempla in *Epidemicis* tradidit .

Objicies ex ipso *Hipp. Aphor. 2. 19.* , , Autorum morborum non omnino tutæ sunt prædictiones , neque mortis , neque sanitatis tis

,, tis „. Hincque signa morbi longius breviusque duraturi certa non esse , adeoque Regulas præscribundæ Diætæ hisce signis innixas haud admodum stabiles .

Resp. Ideo *Hippocratem* ubique sapientissimum sæpe in tradendis suis prognosticis addere suum  $\omega\varsigma\ \epsilon\pi\tau\ \tau\omega\ \pi\omega\lambda\nu$  , adeo ut exceptionem citra ullam hæ Regulæ non obtineant . Posset v. g. contingere in febre continua putrida , ut signa adsint omnia , quæ indicent fore ut brevi crisi salutari morbus terminetur : & interim , ut nonnumquam visum , ad membranam succingentem costas , vel alias nobiliores partes tota vis morbi metastice irruat ; faventemque prognosin reddat falsissimam . Verum Regulæ hæ spectant tantum consuetum Naturæ ordinem , quo non turbato , passim sic continentur : adeoque summopere notandæ Medico , quia sine iis boni nihil , nisi casu tantum , efficiet .

Objicies 2. Ipsum jam olim *Asclepiadem* ut vanum repudiavisse delectum hunc dierum , & ad nostra usque tempora haud incelebres Artis Antistites eum plane ridere , contrarium videlicet quotidiana expertos praxi .

Resp. cum prælaudato *Baglivo* , *Prax. med.* Lib. 2. cap. 12. §. 4. „ Mirari desinant practicantes si hodie nec frequenter , nec perfecte succedant crises ; ut olim in Græcia : „ siquidem illarum Græcarum Legum vel i-

„ gna-

„ gnari , vel obtrectatores , a principio mor-  
 „ bi , ad declinationem usque , Purgantibus ,  
 „ Diaphoreticis , Phlebotomiis , Spirituosis alis-  
 „ que imprudenter , & intempestive exhibitis  
 „ Medicamentis fere consciunt ægrotantem :  
 „ ideo impossibile est ut humores per tam  
 „ diversas Remediorum seditiones distracti ad  
 „ criticæ desumationis negotium statu tempo-  
 „ re disponantur : Sed assiduis confusionibus  
 „ agitati , loco criseos perfectæ in metastases  
 „ præternaturales desinant : atque hac de cau-  
 „ sa , nec criseos , nec dierum criticoram , nec  
 „ aliorum demum Naturæ motuum Regulas  
 „ ab antiquis traditas in febribus observabi-  
 „ mus . Testatur autem sibi juxta has Re-  
 gulas agenti doctrinæ Hippocraticæ veritatem  
 ubique observari . Videatur cap . 12. totum .

Fatentur equidem practici nonnunquam re-  
 rum differentia multarum has Regulas permu-  
 tari : nam pro varietate materiæ morbificæ , æ-  
 statis , temperiei , climatis , temporis anni ,  
 sexus , morbi citius tardiusve *ηργονται* . Sic  
 Pestis , febre pestilentiali ; Febris Pestilentialis ,  
 febri ardente ; Febris ardens febre continua  
 putrida acuta , judicatur citius : imo idem  
 acutus morbus diversos homines affligens ci-  
 tius judicabitur in infante , cui dicente Hippo-  
 crate , calidum innatum majus , quam in ado-  
 lescente ; in adulta ætate citius , quam in se-  
 nio , in viro citius , quam in femina , cæteris  
 pari-

paribus; æstate citius, quam hyeme: in Cholerico, & sanguineo citius, quam in Phlegmatico. Verum falluntur qui vel hinc observationum *Hippocrat.* auctoritatem labefactari autument; cum omnia eorum observata circa harum Regularum varietatem, ipsissima *Hippocratis* sint verba; qui cum suis generalibus Regulis etiam has exiguae varietates observari jussit, quique ipsis exemplis in *Epidem.* has easdem observavit.

Majorem autem auctoritatem conciliavit suis *Hippocrates* observatis dum experiundi gratia, num hæ Regulæ ab antiquis observatæ, sibi que per continuam comprobatæ praxim in disfisis quoque Regionibus æque atque in Græcia obtinerent, filios Discipulosque, ut pridem dixi, quaquaversum misit, atque demum omnia, quæ ipsi notaverant, colligens diserte affirmat sub finem *Lib. prænot.* Et in *Lybia* (ardentissima Africæ parte) & in *Delo* (insula Maris Ægæi sive Archipelagi) & in *Scytia* (Regione priorum respectu frigidissima) has omnes Regulas cum suis exceptionibus comprobari.

Quibus omnibus perpensis magnus ille Vir omnium has Regulas neglecturorum futuram in praxi infelicitatem cecinit vates: *Lib. scilicet 1. de Diæta.* „ Qui, inquit, omnibus his „ rejectis, ac repudiatis, aliam inventionis „ viam, aut modum aggreditur, & aliquid „ se invenisse jactat, is cum fallitur, tum „ , alios

,, alios fallit: Neque enim istud ullo pacto  
,, fieri potest.

Hisce ita stabilitis sequitur ut Medicus va-  
rios in mente Canones ordinet , quos juxta-  
sciat quantum cibi , & qua vi dari oporteat :  
Regula generalis est tantum dari oportere ,  
quo vires queant sustineri, ut coctioni , & crisi  
sufficient .

Canon itaque primus erit quo brevior mor-  
bus , eo minus , & debilius offerendum , &  
contra . Si itaque in febri quatuordecim dura-  
tura dies tam tenuem , & parvam Diætam  
præscripsero , quam præscribere in febre 3.  
dierum debeo , æger meus consumetur , ante-  
quam febris illa suum vigorem adepta sit .  
Unde *Hipp. Aphor.* I. n. 9. ,, Considerare o-  
,, portet etiam ægrotantem , num ad morbi  
,, vigorem victu sufficiet , & an prius ille de-  
,, ficiet , & victu non sufficiet ; vel morbus prius  
,, deficiet , & obtundetur , . Et *Aphor. seq.*  
,, Quibus statim morbi vigor adest , statim te-  
,, nuiter alendi . Quibus vero in posterum vi-  
,, gor , his ad illud & paulo ante illud tem-  
,, pus substrahendum , . Antea vero uberiorius  
alendum , ut sufficiat æger . Vide & *aphor.* 7.  
8. *ejusdem sect.* 1. & *Lib. de Diæt. acut.* pag.  
590. confer cum *Arætæi* pag. 74. a lin. 15.  
ad 20. & pag. 73. a lin. 21. ad 29.

Canon 2. petitur ex ætate ægri cognita ;  
quo enim animalia origini propiora , vel se-  
ne-

nectuti summæ, eo difficilius inediam ferunt. Infantes quippe perpetuo fere fugere, & dormire videmus; qui proin desicerent, si quam tenuem diætam adulti ferant, eam & ipsi ferre cogerentur. Hinc dixit *Hipp. Aphor.* I. n. 13. „ Jejunium ferunt omnium minime pueri, „ quid ita? Rationem dat *aph. seq.* „ Quæ crescent plurimum habent calidi innati, plurimo igitur egent alimento; sin minor, corpus consumitur,. Rident quidam *Hippocratem*, quod crescentibus plus calidi innati dixerit inesse; sed tamen per se res evidens est. 1. Quia cor eo majus, proportione corporis (si prima post conceptum tempora excipias) quo animal suæ proprius origini est; adeoque cor illud majores, ad extrema usque, vires exercet.

2. Quia vi illa cordis majore humores per plura vasa fluunt. Quod & præstantissimum ex recentibus inventis *Farhenheyti* thermometron confirmat, quo infantes 1. 2. gr. cal. plusquam adulti gaudere deprehenduntur.

Senes quoque dicimus inediam minus ferre posse; licet *Hipp. Aphor.* I. n. 13. „ Senes facillime jejunium ferunt,, & *Aphor. seq.* „ Senibus, inquit, paucus calor, propterea paucis fomitibus indigent; a multis enim extinguitur,. Sed hinc non sequitur, quod jejunium ferant commodius. Revera respectu caloris plura alimenta validius disflantis senes

senes dicendi forent jejunium tollerantius ferre, ut bene *P. Alpinus lib. 1. de præsag. vit. & mors. ægrot. cap. 2.* advertit; ut & quibusdam videri posset ex eo quod senes haud ita valide, quam pueri, appetere cernantur; verum omnium sæculorum observatu constat paucum illum in senibus calorem modica, sed continua ali materie debere. Quare & apud illos, quibus jejunia indicere Religio mandat, senes veluti rude donati milites excusantur.

Canon 3. desumitur a statu, & vehementia morbi, si cognoscuntur. In vigore tenuissima & pauca, in adscensu, & descensu eo plus, & meracius dandum quo magis distet a vigore morbus. Hoc jam pertractavi *ad 1. Can.*

Hordei infusum, decoctum, tremor, puls, omnem hic absolvunt paginam paucis verbis rem totam complectitur. *Hipp. Aphor. 1. n. 7.* „ ubi peracutus est morbus statim estremos „ habet labores, & extreme tenuissimo victu „ uti necesse est: ubi vero non, sed plenius „ cibare licet, tantum a tenui recedendum, „ quantum morbus remissior extremis fuerit. „ Vide & *Aretæi pag. 74.*

Canon 4. colligitur a loco quem æger incolit. Qui enim æquatori vicini tenuem viculum facile, polis autem propiores difficulter ferunt. Hinc *Hipp. Aphor. 1. n. 2.* Jubet Medicum „ respicere Regionem, & *Aphor. 1.*

n. 17. ubi generales Regulas antea recensuerat , has non ita obligare censet quin aliquid concedendum sit Regioni . Potissima autem ratio consistit in frigidiore vel calidiore elimate ; cuius rei ratio mox dabitur .

Canon 5. habetur ab anni tempestate ; cum constet Hyemem validiora petere , tenuissima æstatem . Unde *Hipp. Aphor.* 1. n. 18. „ Æita- „ te , & autumno cibos difficillime ferunt , „ hyeme facillime , deinde vere . Hinc jubet „ Medicus attendat ad anni tempestatem qua „ morbi contingunt . „ *Aphor.* 1. n. 2. & n. 17. „ Quæ ratio hujus ? „ Ventres inquit , „ *Aphor.* 1. n. 15. hyeme & vere natura sunt „ calidissimi , & somni longissimi . In his igitur temporibus etiam alimenta plura exhibenda : Innatum enim calorem majorem habent . Nutrimento igitur copiosiore indiget „ . Frigus nempe extremum reddit corporis fibras hyeme , quam æstate , rigidores ; quæ hinc fortiori actionem simul exercentes , validiora , in quæ agant , alimenta requirunt ; corpore aliqui citius defecturo . Quæ regula neglecta Medicos , qui magna cum laude in Italia aliisve calidioribus Regionibus medicinam fecerunt infortunatissimos effecit , dum in Suecia , Dania , Polonia &c. ad Magnatum aulas advocati Septentrionales homines eodem , quo Italos , pede metiebantur . Sane in Asia homines aqua , & fructibus horæis felicissime

degunt, fastidiuntque frequentem solidiorum usum: Borealis vero populis carnes piscesque saliti, atque alia dura alimenta cum meatra cerevisia conducunt, a tenuiore cibo minus bene se habentibus. Vide *Hipp.* in lib. I. de *Dietia*.

Canon 6. conficitur a consuetudine ægri, ejusdemque Naturali temperie seu idiosyncrasia. Ratio est quia sani lautissimis usi, eaque facile difflant, ægrotantes quoque pluribus egent cum vasa & viscera his assueta sint. Ajunt quidem vulgo, quo homo lautioribus assuetus, eum eo facilius toleraturum inedia; pauperem vero, cui res augusta domi, difficulter: sed pessime falluntur. Homo enim sobrius minima re contentus est, dum helluoni a minima inedia vasa collabuntur. Quare & Dictator noster *Aphor.* I. n. 17. „ concedens „ dum aliquid consuetudini „ & causam præcepti hujus hance ait esse, quod qui copiosioribus, & lautioribus assueti sunt, longe gravius subitam ferunt in tenuorem victum mutationem: ita quidem ut „ a multo tempore „ consueta, etiamsi fuerint deteriora, insuetis „ minus turbare soleant. *Aphor.* 2. n. 50. „ Pulcrius vero *Aphor.* seq. „ Omne multum. „ Naturæ inimicum: quod vero paulatim sic „ tutum est; tum & alias, tum & si quis ex „ altero ad alterum transeat. *Libr.* autem de „ *Diat.* in acut. pag. 391. pluribus exemplis „ quant-

, quanta sit consuetudinis vis , quamque periculosa cita mutatio , pulcerrime demonstrat.

Canon ultimus concinnatur a sensu leviore , vel graviore qui post assumta solet sequi. Hæc demum erat sapiens illa Antiquorum Medicina , qui a juvantibus nocentibusve certam confecere doctrinam : ita ut lib. de prisca med. Hippocrates ex hacce observatione non modo natam fuisse medicam artem , sed & ex eadem non nasci non potuisse scribat. Sic si ægro data fuit hora prima Ptisanæ unc. Iisque deinde levatum se sentierit , dari sesquiancia potest hora sequenti: bene iterum hinc se habenti dabuntur hora tertia unc. II. a quibus si paulo minus recte habere videatur , immiuatur pauxillum . Sic iusta tandem mensura obtinebitur . Juberi custodes ægrorum , maxime infantum , poterunt sedulo ut advertant ab eo quod dederint num somni æque boni , Respiratio æque facilis &c. Hæc vera Hipp. methodus quam tradidit lib. de Loc. in hom. a pag. 419. ad 422. Ut & lib. de Liquid. usu pag. 424. 425.

Hæc sufficient , opinor , ut pateat quam simplicissima res , si semel bene intelligatur , sic Diætæ in acutis præscriptio ; quamque firmæ innixa basi contra omnes litigantes , interque se digladiantes Medicos , immota perstiterit .

Nequē magis negotium Diæta facescit sanctorum ; quæ Regulis sequentibus tota innititur.

1. Sanitatem perfectam sē ipsam destruere , cum sit aptitudo in corpore ad exercendas actiones : quæ aptitudo constat in determinata partium tam firmarum , quam fluidarum mobilitate : perfectam autem sanitatem partes firmas ex sua natura deterrere , fluidasque consumere . Hæc sane probatione non indigent , cum æternum observatum sit animalia deficien- tibus alimentis interire .

2. Hinc requiri ut quoad copiam , & qualitatem tantum , & tale restituatur , quantum , & quale perditur : loquor autem de homine εκπην adepto . Est Aphor. Magni Sanctorii Sect. I. n. 1. & 10.

3. Cibum potumque , forte & aerem , huic restitutio ni famulari , non quidem per se , sed per actiones animales , vitales , naturales ipsius corporis , quibus ad loca requisita , & re paranda applicantur . Sic Hipp. lib. de alimento . Φυσις εξαρνεται παντα πασιν . „ Natura per omnia sibi sufficit : ad eam extrinsecus quidem accedunt alia . . . . intrinsecus autem , & ex prædictis quædam , & ad hæc causa occulta , & toti , & parti ; & cuidam etiam , cuidam vero minime . . . Et paulo ante docuerat , id , quod uni alimento cedit , non cedere alteri , ut lac , vinum &c. Lac enim tam  
blan-

blandum , tam amicum humoribus humanis , non nutrit , sed corruptitur , & dira symptoma creat , si virtute corporis non subigatur ; ut tristissima & numero infinita exempla in infantibus &c. testantur .

4. Medicum ideo nosse oportere quidquid corpori ingeri , aut applicari , ab eoque exerceri queat , quæ omnia titulo VI. *Rerum non naturalium* recensentur , commodeque revocantur ad ingesta , gesta , retenta , excreta , & applicata externa . Confirmatur ex Hipp. elegantissimo textu , qui simul , & priorum propositionum veritatem demonstrat , ex lib. i. de *Diæta* . „ Qui de hominis , inquit , victus ratione recte scripturus est , eum , meo quidem judicio , primum totius hominis natum noscere , ac dignoscere oportet . Ac nosse quidem ex quibus ab initio constet ; dignoscere vero quænam in eo partes superent . Nisi enim primam constitutionem noverit , quodque in corpore supereret , ea quæ homini conducant minime offerre poterit . Hæc igitur quæ scripturus est , cognoscere debet , deinde vero ciborum omnium , ac portionum ex quibus victus ratio constat ; quam singula facultatem , tum ex natura , tum ex necessitate & arte humana obtineant . Scire namque convenit , quanam ratione ex valentibus natura vis detrahatur , & quomodo imbecillis ; ut cujusque occasio se obtulerit

„ vim ex arte adhibere oporteat. Neque com-  
„ memoratorum cognitio ad hominis curatio-  
„ nem satis esse videtur , quandoquidem qui  
„ comedit , nisi etiam laboribus utatur , sanus  
„ esse non potest. Cibi enim , & labores ad-  
„ versas inter se se facultates , mutuo tamen ad  
„ sanitatem conferentes , obtinent , Labores  
„ namque ea quæ adsunt , consumere solent ,  
„ cibi vero , & potiones , quæ vacuata sunt  
„ explet. Laborum autem , quantum par est  
„ facultas , tum eorum qui a natura , tum eo-  
„ rum qui per vim contingunt , dignoscenda  
„ est , & quinam ex ipsis carnes ad incremen-  
„ tum , & qui ad defectum preparent. Ne-  
„ que ista tantum , verum etiam conveniens  
„ laborum modus , qui a nobis adhibetur , pro  
„ ciborum copia , hominis natura , & corpo-  
„ rum ætate , pro anni temporibus , & ven-  
„ torum mutationibus , pro locorum situ , in  
„ quibus vitam agunt , & pro anni constitu-  
„ tione. Quin etiam syderum ortus , & occa-  
„ sus noscendi sunt , ut mutationes , & cibo-  
„ rum ac potionum redundantias , Ventorum-  
„ que & totius mundi ex quibus sane morbi  
„ hominibus proveniunt , observare sciat. Ne-  
„ que tamen cum hæc omnia cognoverit , sa-  
„ tis invenisse existimandus est: Nam si præ-  
„ ter hæc inventus fuerit cuiusque naturæ con-  
„ veniens cibi modus , & laborum numerus ,  
„ qui neque supra , neque infra modum exce-  
„ dat ,

,, dat , sanitas sane hominibus exacte inventa  
 „ fuerit .

5. Difficile esse hinc ejusmodi cedere Regulas,  
 quæ homini cuique ex æquo prosint , ob idio-  
 synkrasiam , seu propriam cuiusque commissio-  
 nem . Hinc *Hipp.* jubet Medicum curare opor-  
 tere communia cunctis , & singulis propria in-  
 tuentem .

Cæterum allatus mox ad n. 4. ex *Hipp.* tex-  
 tus hoc , abunde confirmavit . Idem *Celsus* ex  
*Hipp.* jubet *præfat. lib. 1.*

6. Ita ut eadem res in hominibus eandem  
 vivendi normam sequentibus sœpe oppositos e-  
 dat effectus : Hinc singulis hominibus *suam* , &  
 integrum sanitatem servari , licet non tantum  
 vario , sed plane opposito modo usum vi . Re-  
 rum non naturalium instituant : Sic quidem ,  
 ut si vivendi rationem permutaverint vicissim  
 inter se , mox utriusque alieno more fruentes  
 ægrotent , qui suo proprio morigeri rite vale-  
 bant .

Probat hanc veritatem locus *Hipp.* ad n. 4.  
 allatus . Confirmat *Baco Verulamius* exemplis  
 integrarum nationum opposito more bene va-  
 lentium , mutata vero vicissim inter se vivi-  
 vendi norma , ægrotantium . Imo narrat *Bra-  
 chmannos* seu *Gymnosophistas* Indorum , qui in  
 vitæ sustentaculum nil , nisi quod de semine  
 fato supra terram , non infra , crevit , & aquam  
 assument , sanissimos vivere , fierique longævos .

alios autem Indos in eadem tellure carnibus pluribus utentes vivere quoque valentissimos; mutato vero more, utrosque ægrotare.

7. Ipsam consuetudinem, vel Idiosyncrasiam, hinc tantam exhibere varietatem, ut prorsus incredibile sit; ita ut mutatione subita, licet ex peccatis in optima, periculosius nihil. Docuit namque *Hipp. Aphor. 2. n. 38.*, Pau-,, lo deterior & potus, & cibus, jucundior,, autem, eligendus potius, quam meliores,, quidem sed ingratiores,. Crassum proinde errorem erraret, qui ad hanc miram consuetudinis vim, ceu alteram Naturam, non adverteret. Imo observavit sapiens *Hipp.* hanc consuetudinis vim contra consuetum Naturæ ordinem obtainere, *Aphor. 2. n. 49.*, Con-,, sueti solitos, inquit, labores ferre, etiamsi,, fuerint debiles, aut senes, facilius eos fe-,, runt, quam quidem insueti, Robusti licet,, juvenesque fuerint. Et *Aphor. seq.* „ a-,, multo tempore consueta, etiamsi fuerint de-,, teriora, insuetis minus turbari solent.

8. Ætatis, sexus, temporis anni, regionis &c. distinctionem præprimis esse necessariam. Probatur ex testimonio *Hipp* ad n. 4. allato. Quin & idem ex *Hipp.* probavi, dum ea de re sermo kebat in acutorum diæta. E-dacissima vetustas eripere nobis non potuit Epistolam *Dioclis* ad Regem *Antigonum*, quæ sa-juberrimis pro toto sex rerum non naturalium

usu juxta varia anni tempora permutando præceptis abundat.

Hisce visis Regulis Diætæ cum sanis præscribendæ tum ægris , rogatus de Diæta sententiam respondere demum potero.

Rogatus an cibandus sit æger? quomodo? quando? quibus &c. cibandus sit? datæ antea Regulæ aptam formabunt Responsonem.

Rogatus de Diæta sanorum sententiam , respondere potero ad præscriptos me Canones convertendo , alioqui cespitaturus .

Rogatus ultra , multum ne , an parum comedere præstantius? Respondere in genere possum utrinque peccari: Nam „ non satie- „ tas , non fames , neque aliud quidquam bo- „ num est , quod naturæ modum excedat „ .  
*Aphor. 2. n. 4.*

Tamen si in alterutram partem peccatur , dico peccata excessus facilius quam defectus tolerari ; idque tum in sanitate , tum in morbis . Medico enim auferre facilius quod abundant , quam quod deficit , apponere . Hinc *Hipp aphor. 1. n. 5.* „ in tenui victu delin- „ quunt ægri ; ob id magis lœdunt . Omne e- „ nim delictum quod committitur , multo ma- „ jus sit in tenui , quam in paulo pleniore „ victu . Propterea etiam sanis periculosus est „ valde tenuis , & constitutus , & exquisitus vi- „ ctus , quia delicta gravius ferunt . Ob hoc „ igitur tenuis , & exquisitus victus , periculo- „ sus

„ sus magis, quam paulo plenior.

Nihilominus exceptionem dico in hominibus obtinere, qui tenui valde diætæ assueti sunt dudum; quos constat diæta in qualitate, aut quantitate, vel paululum excedente in summa periculi conjici. Clarum rei exemplum exhibuit *Ludovicus Cornaro Venetas* in Libellis suis de *Laude Sobrietatis*. Magnus ille vir *tract.* 1. quem 83. annos natus conscripsit, narrat se vitio intemperantiae more saeculi sui sibi juveni multas conciliasse ægritudines, ideoque a 35. ad 40. ætatis annum medicam opem frustra expertum, tandem id consilii a Medicis accepisse, ut sobrietatem coleret, quam saeveverissime, ea spe fore ut contrariis uno omnibus ore affirmantibus. Consilio huic parentem se vivendique normam sensim strictiorem observantem, tandem fuisse ab omnibus, quibus antea fere succubuerat ærumnis liberatum. Cum ætatis 78. annum ageret, pro uncii XII. quas quotidie sumere sueverat, se jam suasu Medicorum unc. XIV. sumentem in multa incidisse incommoda: a quibus non nisi antiqua tenuissimaque revocata Diæta convalescere potuit. *Tract.* 3. quem nonagenario major confecit, scribit se quotannis per duos menses lethali fere languore corripi, ubi vinum cui assuetus erat, nimium inceperat veterare, neque ultra ratione tunc refici potuisse, ab omni veteri vino pejus se habentem. Novo autem vino

vix 2. s. dies usum , ilico pristinæ se redditum sanitati . Ergo tenui assuetis vicii excessus pejor quam defectus . An ergo , si quis posset prima strictioris diætæ incommoda preferre , seque deinde perpetuo ei addicere , promissam a *Cornaro* , *Leffio* , &c. longævitatem indipisceretur ?

Dico quæstionem hanc multa non carere difficultate . Exemplum *Cornari* multos , id ut crederent induxit . Nobilis ille Vir in omnibus suis tractatulis , quorum ultimum centenario major conscripsit , suo , & Anacoretarum exemplo hujuscenodi diætæ vim ita extollit , ut summam , amabilemque senectutem omnibus eam colentibus pollicatur ; candem vero negligentibus suæ ipsorum intempestivæ mortis causam imputet . Certe si quæcumque ille de tali vivendi ratione conscripsit considero ; si *Thesaurum sobrietatis* a *Leonardo Leffio* Theologo omnia , quæ *Cornarus* scripserat multis confirmante exemplis , confectum pervolvo ; si quæ *Flav. Josephus lib. 2. bell. jud. cap. 12. de Esselianis* , quæ *Arnoldus* aliquique de Eremiticolis tradidere , perscrutor ; facile induceret strictissimam , & ad pondus mensuratam Diætam omnibus aliis ut anteferrem . Perpendenti vero contra quæ Practici testantur , multos scilicet sapientissimos Viros vitæ tranquillæ & longævæ amore *Cornarum* imitando tam pessime affectos esse , ut & tranquillioris , & lon-

gæ-

gævioris vitæ spe simul exciderint, animus hæret. An ratio est, quod *Cornarus* exauclus omnino fractusque viribus, ac fere perditus hanc strictam vivendi normam amplectend tam comode eam tulerit; dum interea viri alii ipsum imitati corpore integro robusto, ubi nullis adstrictum legibus degebat perbelle valente, hanc *Cornari* Regulam minime perferre potuerint? Sane & Practicorum observata eo inclinare videntur. Nonne præterea multum huc facit quod *Esseniani* Asiatici, *Anachoretæ* quoque Afri, vel Asiatici fuerint, calidissimas proinde Regiones incolentes, ideoque ipso naturæ ductu ad sobrietatem apti? Videntur omnia observata id confirmare; cum jampridem constiterit eo voraciores esse homines quo polis propiores, eo magis sobrios quo Equatori viciniores, cæteris paribus. Hinc Asiatici illi in strictiorem Diætam proniores, & aptiores dicendi videntur.

Porro ad vitam cum incolumem, tum longævam degendam strictissime necessitatem diætæ ex dictis concludere nequeo. Imo ipse *Hipp.* qui ad decrepitam usque senectutem pervenit, allatis mox testibus eam condemnavit.

Hinc Latinissimus *C. A. Celsus*, qui in sui sæculi intemperantiam ingluviemque, ut sanitatis pestes, adeo invehebatur, hominibus sanis sive curam gerentibus sequens consilium dedit lib. I. cap. I., Sanus homo, qui, & „ be-

„ bene valet , & suæ spontis est , nullis obli-  
 „ gare se legibus debet , ac neque Medico ,  
 „ neque Jatralipta egere . Hunc oportet ha-  
 „ bere varium vitæ genus ; modo rutri esse ,  
 „ modo in urbe , sæpiusque in agro : navigare ,  
 „ venari , quiescere interdum , sed frequentius  
 „ se exercere .

Oggeret forte aliquis sanam , & longam  
 quorundam in Monasteriis viventium vitam .  
 Sed respondeo pauca exempla ex tot Myria-  
 dibus Monacorum , & Santimonialium juxta  
 certam Regulam stricte viventium , nihil omni-  
 no probare ; cum rariora conclusionum a com-  
 muni desumptam haud eludant . Scilicet , &  
 suos quisque patiuntur manes in cœnobiis . Qui  
 his invigilant Medici testantur plura certaque  
 morborum genera ibidem obtinere : Monachis  
 perpetuo oleorum usui devotis Hernias esse ,  
 qnam cæteris , frequentiores . Inter Moniales  
 Scirrhos , & Cancros Mammarum aliarumque  
 partium crebrios contингere . Cæterum apud  
 strictissimæ Regulæ observantissimos ordines Me-  
 lancholiæ , & Hypocondriacas passiones pla-  
 ne domesticas esse , & a priori facile conclu-  
 ditur , & a posteriore evidenter demonstratur .  
 Ut proinde amabilem & longævam vitam a  
 Cornaro promissam nullatenus frequentem hic  
 reperias : sed de hac questione satis .

Si Roger præterea an aliquis cibus potusque  
 saluber sit , v. g. Gascus : cavebo ne præceps  
 dede-

dederim responsum: sed respondebo ex datis Regulis cum magno *Hippocrate*, qui ubi *Lib. de prisc. Med.* vetuerat quodcumque exculent, & potulenti genus insalubre aut proficuum pronuntiare nisi ad varias hominum naturas cæterasque circumstantias te converteris, dein arguit eum; qui Caseum molum edulium dixerit, quia inde male quisquam affectus fuit „ Nam inquit, si universæ hominum naturæ „ infestus esset, omnibus utique noceret „. Hinc jubet examinare prius qualis sit ejus, qui Caseum assunxit natura. Tum & nobis, quibus tot varia prostant Caseorum genera, prius determinandum foret Casei genus. Eandem cautelam loco citato *Hipp.* observandam precipit in omnibus, quæ vel ingeruntur corpori, vel applicantur; ita quidem ut aliter nata ex his phænomena explicare, aut iisdem recte uti, Medicus nequeat.

Rogatus quænam Diæta præstet: ex molibusne, & sponte auscentibus, an ex acribus calidisque?

Respondebo in genere prodeesse alimenta mollia, natura sua acescentia, acrimonia fercarentia. Sic panis, & aqua, triticum, hordeum, oryza, & id genus alia omnium comprehenduntur saluberrima, sed præcipue hominibus robustis, corpus valide exercentibus. Iis vero qui inclinant in spontaneum acidum, in Leucophlegmatiam, debilitatem, incipientem

Hydropem, cætera sanis, præcedentia non sola, sed cum acribus calidisque conjuncta prosunt. Qui si utriusque suum vicissim inter se vivendi modum permutaverint, ægrotabunt.

An vero perpetuo hisce erit hæc Lex observanda?

Resp. Neutquam, si causæ, ob quas præscribatur dispareant. Diæta mutanda est ubi homines robusti se minus exercent, quietem plus colunt, tum enim, ex acescente Diæta pejus habere inciperent: tum, & ubi debiliores antea existentes Leucophlegmatiæ timorem jam superaverunt, sensim Diæta permutanda erit, ne in oppositos morbos inclinare incipient.

Quin etiam notabile est, homines præ Leucophlegmatiæ metu in ipsum Hydropen incidere posse, si diætam ex acrioribus, siccioribus, salitis nimis diu pertinaciterq. continuauerint. Cujus rei memorabile exemplum ad Clar. Hottonum scribit *Baglivius in Dissert. var. argumenti* nempe Cardinalis *Norrisii*, qui metu Hydropsis quondam futuri, salinis, siccis, acribus, & calidis diu pertinaciterq. usus post aliquos annos incidit in ascitem fatali. Hydrops namque, & ab aquosorum acescentiumque nimio, ac diurno usu, & animia continuaque calidorum, acrum, durorum, siccorum, tenacium assumptione, oriri observatur.

Qui-

Quibus omnibus perpensis prolixiore conclusione opus non erit, ut, quam Medicinæ adeo inique inurunt, infamiam abigamus. Conclusionis tantum loco adscribam magni Hipp. verba, qui ubi præclaros suos de Diæta, & Medicamentis Canones scripserat, tandem lib. de Loc. in hom. sic concludit: Ars sane Medica jam mihi tota inventa esse videtur, quæ sic comparata est, ut singulas, & consuetudines, & temporum occasiones doceat. Qui enim hoc pacto artis Medicæ cognitionem habet, is minimum ex fortuna pendet; sed & citra fortunam, & cum fortuna, recte eam administrabit. Firma enim est ars tota Medica, ejusque præceptiones, ex quibus constat, pulcerrimæ, fortuna minime indigere videntur.

### §. III.

*Situm dispositionemque partium intra corpus latentium, imo vel ipsum externum corporis habitum, nonnumquam ita imponere medicis, ut in Diagnosi, & Prognosi alucinentur quam turpissime.*

Objectio hæc vulgo creditur multis probari argumentis posse; quæ an probent agite videamus.

1. Narrat Jacobus Rhoaltius Phys. part. 4. cap. 2. Cadaver a se visum, quodque aperatum

tum exhibuit hepar in sinistro potissimum latere, in dextro autem collocari Lienem. Idem *Riolanus* narrat. Unde Medicum ex partium situ de morbo iudicaturum, necessario falli oportuerat.

2. Scribit *Tulpius Consul Amstelodamensis lib. 3. cap. 45.* exemplis nonnullis constituisse sibi quod homines aliqui arteriam in interiore carpo tam exilem haberent, ut pulsus ibidem sentiretur debilissimus; qui iidem majorem arteriam in manus dorso pollicem inter indicemque gerebant. Addit celebrem Medicum post explorationem pulsus in Carpo Senatoris Reip, nostrae arteriam exposito mox more habentis, tuncque temporis valentis panceratice, Senatorem pestilentia laborantem pronuntiasse.

3. Quotidiana exempla docent quomodo signa adeo celebrata Medicis, quæ petuntur ex pulsu, Respiratione, urinis, sæpe turpiter suos fallunt cultores.

4. *Hipp.* ipse suo sero sapiens exemplo docuit quam sint fallacia signa distinguendi fissuram Cranii, ab ejusdem Sutura: quum fatetur se ex hac re ignorata hominem pessum dedisse: in quo ab injecto cominus in medium Synciput lapide, curando fissuram Cranii settuisset ait, credentem aliud nihil, quam futuram esse: hinc non animadvertisse se hominem incisione indigere. Ita *Epid. V.* pag. 1150.

5. Sapientes Medici visi qui miseram fæminam hydrope uterino , asciten mentiente , vexatam , exemplum cæterum Castimoniæ , ut talem , quæ pudicitiam venalem haberent pronuntiaverint ; & vice versa quæ revera impregnatæ erant , has ullo modo gravidas esse negaverint . Leidensis Professor *Carolus Drelincourtius* miseram ancillam Hydrope uterino vexatam vile scorbum esse dixit , donec defunctæ cadaver incidens puellæ castitatem fati coactus fuerit , *Parisienium Obstetricantium asseveratione freti judices* , fæminam dictam *Genevieve supplice* quæ se gravidam dixerat laqueo suspendendam jubent ; quam diffsecans *Riolanus* a V. circiter mensibus gravidam fuisse invenit . Vide *Riolan.* cap. 2. Lib. VI. *Anthropog.* Simila quid *Moricæus Maledes fem. gross.* Lib. I. cap. 117. a se visum ait *Parisiis* anno 1666.

En densum agmen objectionum , quas ingeneri prolatas , suis adjectis , ubi hæ deerant , historiolis adornavi , ne quidquam iis deesset . Quarum ad singulas nunc conabor ordine res , pondere .

Itaque ad 1. scilicet ad Rohaltii historiam . Quando natura variat in variis locandis corporis partibus non est quod inde prudens & sagax Medicus in curando fallatur . Namque si a parte affecta quam falso Medicus assignaret , oriretur inflammatio febrisque curam antiphlo-

tiphlogisticam internis externisque auxiliis applicando Medicus cujuscumque demum partis inflammationem æque curaret.

Verum secundo; Medicus non ex situ partium tantum judicat, sed ex morbi Phænomenis, ab excretis a retentis ab actione læsa, & sic porro. Pulcerrime hanc rem quotannis Cl. *Albinus* venerandus professor meus, in *Splaunchnotomia* Tab. IX. *Eustachii* explicans, inculcare solet: quandoquidem a læsione in latere thoracis vix semidigitum profunda, vulnerari hepar, vulnerari pulmo, vulnerari diafragma &c. queat. Hinc pathognomica, si qua adsint, consulenda vel apparentia saltem signa, quæ quanam in parte læsio obtineat, indicent. Cum nunc plerique hepatici morbi per litterum sese manifestari soleant, perspicax Medicus illico indicationem veram intelligeret.

Quod si tertio paulisper daremus ab hoc naturæ lusune dicam, an errore, Medicos falli, non est quod artem vel hinc vituperent adversarii. Fiant tales lusus naturæ hisque magis mirabunda; tamen firma suis inconcussâ principiis perstabit Medicina. Millenorum cadaverum incisiones res exhibuere, ut juxta naturam in omnibus adesse solent; differentiis exiguis ad rem prorsus nihil facientibus hinc inde ab Anatomicis notatis. Quod monstrabulant quod consueto ordine alia excedant, hoc non infringet propterea Canones quos o-

mnum sæculorum severissima confirmavit. stabilitque observatio. Neque apud solos medicos hocce axioma locum habet, sed apud alios quoscumque. Hoc subvertere qui conatur, næ omnes vel sapientissimos Viros in suis juxta consuetum naturæ morem ferendis judiciis vituperat. Disciplina quævis tantum a perfectis traditur.

Objectio 2. petita ex *Tulpio* aliud nihil quam medicum illum imprudenter egisse, docet; neutquam vero medicinam hic suis deesse cultoribus. Revera pulsus ille debilis observatur initio pestis testantibus, id qui pesti interfuere, Medicis: verum ex eo solo judicium ferendum non erat. Unde *Tulpius* adit,, Imposuit viro eximio inusitatus hicce lusus: Quem ubi vidi cecinit illico Palindiam, & pertæsus præproperi judicii docuit suo exemplo NIHIL CONSILIIS MEDICIS TAM ESSE INIMICUM, QUAM CELEBRITATEM; Ars siquidem docebat ipsum & alterum carpum, vel, & in jugulo Carotidem tangere, ubi homo bellissime valere visus pulsum tam exilem exhibebat: Quin & alia quoque indicia consulenda forent, v. g. horripulationis, quæ primo invadentis pestiferæ labis momento hominem concutit, vel splendoris amœnorumque colorum subito oculis quasi exhibitorum, &c.

Objectio 3. ingens aliquando negotium facet

sit imprudentibus Medicis . Qui vero artem  
probe edocti sunt , norunt quid demum certi  
ex pulsu , respiratione , & urina colligatur ,  
quantisque opus sit cautelis ne decipientur .  
Sciunt namque primo Pulsum arteriarum re-  
nuntiare conditionem definitam cordis , ceu pri-  
mi motoris: indolem deinde , copiamque , &  
motum humoris nostri universalis , unde reliqui  
humores omnes derivantur ; tum & statum va-  
rium arteriæ ipsius , quæ omnium Corporis  
partium fere primarium vas ; denique in mor-  
bis materiæ morbosæ ; & movendæ , & motæ ,  
& excretioni paratæ , & jam incipientis fecer-  
ni , indicem esse . Secundo , pulsum differre ju-  
xta ætatem , sexum , tempestatem anni , actio-  
nes animi corporisque varias , &c. Tertio pul-  
sus vel bonus , vel malos , in genere dictos ,  
tamen suas habere exceptiones , ut est v. g.  
*fortis* in Apoplexia ; *debilis* in obesis : *mollis*  
*debilisque* , in sœvissima pleuritide ad huc inci-  
piente , sed in qua præ vi doloris suffocatur  
Respiratio .

Hinc bene *celsus* „ venis , inquit , maxime  
„ credimus , fallacissimæ Rei „ Cur ? „ quia sæ-  
„ pe istæ celeriores lentioresve sunt & sexu ,  
„ & ætate , & corporum natura . Lib. 3. cap. 6.

Quæ cum ita sint haud percipio cur Me-  
dicinam hanc ob causam vituperent , quum ipsa  
Tyrones suos doceat omnes hasce differentias ,  
atque exceptiones , quibus observatis bonum tan-

dem vaticinandi fundamentum præsto est ; quumque in primis præcipiat & alia quoque consulere signa , antequam Diagnosis ac Prognosis formentur : dicente quam pulcherrime *Celso* loco mox citato „ Feriti Medic i est , non „ protinus , ut venit , apprehendere manu bra- „ chium , sed primum residere hilari vultu , „ percontarique quemadmodum se habeat ; & „ si quis ejus metus est , eum probabili ser- „ mone lenire , tum deinde ejus corpori ma- „ num admovere .... Neque in tenebris ne- „ que a capite ægri residere debet sed illu- „ stri loco adversus eum , ut omnes notas ex „ vultu quoque cubantis perspiciat .

Scripsit equidem ad virum in aula Gallica Illustrissimum *Philipæum Ludovicus le Comte*, se Medicos Sinenses tam peritos in pulsu explorando artifices invenisse ut testetur eosdem arteriam per ; horæ varie tentando & explorando tam exacte morbi causam , naturam , exitumque definire posse , ut contrario leventur arguantur nunquam .

Tamen an hoc verum sit vehementer dubito ; siquidem idem scriptor paulo post fateatur Medicis illis non ignota esse , quæ mox in Vroscopis arguemus , fallendi articia . Ut tandem credidérim nihili faciendam ipsorum scientiam esse . Vid. *le Comte Hist. chin. epist. VIII.*

Quoad Respirationem ; hanc Medicina do- cet . I. designare Conditionem presentem Cor- dis .

dis , Pulmonum , Cruoris , Liquidi cerebellosi , Membranæ succingentis costas , Thoracis ; Diaphragmatis , Abdominis : 2. Eandem variare pro ætate , sexu , tempestate anni , motu animi corporisque temperie . 3. Exceptiones in Diagnosi & Prognosi habere ; cum v. g. suffocativa Respiratio , brevi alioqui Lethalis futura ; in Melancholicis , & Hystericis talis non sit , nec etiam in Asthmaticis , quibus eadem jam in consuetudinem versa sit . 4. Malignos homines dolo malo respirationem mutando Medicum turpiter fallere , ni attendat , posse . Hæc sunt quæ Medicina de hoc signo docet ; ultra nihil quæ nihilominus imperitis vituperatur , quasi citra ulla exceptiones generalia tantum effata proferret .

Tandem urinæ signa mirum quam ciscum-specte medicina tradat . Docet namque primo urinam variam esse in eodem homine , & in aliis illi comparatis , pro varietate ætatis , sexus , temperiei , tempestatis anni , sex rerum non naturalium , ac præcipue assumtorum . Hinc secundo Vroscoporum artem hucusque notam ubique fallaciæ plenissimam esse , si Medicus in ferento ex ea iudicio non simul ad reliqua apparentia in ægritudine signa adver-tat . Tertio tantem cum his cautelis declarare urinam , ut plurimum , sanguinis indolem im-petum , symptomata morbi , coctionis , secre-tionis , & criseos statum ; morbos partium per-

quas, aut *juxta*, quas urina perfluit; ut & aliquas in bile, & ex bile natas egritudines, cætera, si sola ex urina, sola conjiciuntur, admodum in certa, & ridicula fere esse, artisque apud imperitos honorem in opprobrium vertere.

Hinc eandide fassos audivi claros in arte vires *ultra* hæc scire se nihil. Jactitent alii quantumcumque voluerint, arcanam suam, quam utinam possiderent! Scientiam: vel ipsi coacti verum fateri insectiam prodent, aut eventis saltem, apud emunctæ naris homines, convincentur falsitatis. Æstatem consumere qui vellet omnia vel notissima ridiculæ hujus ascientiæ exempla conscribere, dum nempe quamvis morbi speciem cujusque morbi statum mortem omnino non affuturam, vel certo instantem, assumta intra corpus omnia, gesta corporis animique, hominis ætatem, sexumque, graviditatem, & alia ex sola urina conspecta hariolari se posse jactitant. Cum vel Nebulonibus, qui Medicos scientia vana turgidos animi gratia nonnumquam decipiunt, notissimum sit, urinam sanissimi hominis, quibusdam clanculum assumptis teterrimorum exhibere morborum indicia. Haud inficias ivero, quod sëpe plus, quam alii Medici consulentibus respondeant: sed unde plus respondeant, inquirendum. Ignarum nempe vulgus plus loquitur sëpe quam locutum se esse novit; ita ut attentus Vroscopus hanc tacite secum simplicitatem ridens plenis tandem

dem buccis vatem agere incipiat; vel & astute percunctando, quasi aliud agens, quid demum respondeat, satis noverit. Rogatus a nostro *Beverwykio*, *Thomas Fienus*, *Lovani* olim in Medicina Professor, suam super Vrascopia sententiam, respondit, hanc potissimum ob causam id se prosequi negotii, quia cernebat hinc complures nummos Medicorum in crumenas redundare; quoad auctoritatem sibi in respondendo conciliandum, ajebat artificiose interrogando ignaros plebejos, prudenterque ex interrogatis conjecturando, saepe rei se posse veritatem detegere. Vide *Bevercethes.* mōrb. Lib. I. cap. 2. Cum vero rerum peritus & circumquaque attentus, ne in considerate quid effutiat, quo responsurus Vrascopus fulciatur, consultationem init, videmus magnos illos Artifices aqua hærere, vel turpitudem prodere suam. Sic amicus quidam meus, juvenis, suam propriam sanissimam urinam astute detulit ad famosum Vrascopum, a quo hoc responsi recepit, urinam nempe esse fœminæ octuagenario majoris, anxietatibus in Hypogastrio vexatae & nescio quæ futilia alia. Memini narrantem me audivisse Cl. *Boerhavium* quod hujusmodi jactatori dixerit, se deposito, quocumque ille vellet, pretio, aliquot urinalia cum virorum debilium urina, alia urinalia cum urina fœminarum viraginum, notis vroscopo incognitis cuique, urinali appositis; inter

ter sese invicem permixtum: quod si ex permisitis urinalibus ille tunc virorum posset a fœmininarum urinis dignoscere pretium lubenter se persolutum. Verum prudenter abstimuit jactabundus homo ab hoc pacto ineundo.

Itaque quum Medicina sobrie sapere suos cultore doceat, & juxta certissima indicia cautam diagnosin Prognosimque formare præcipiat, manet ei, æternumque manebit suus honos; quidquid in eam deblaterentur ignari, quasi sua ipsius auctoritate imprudentiam quorundam tueretur.

Verum in artis tutamen & aliud addendum. Bonus Medicus juxta prudentiam artis secum perpendens ægritudinem, vidensque probabilem instare mortem, cavet quacumque animi Religione possit, ne id æger internoscatur: quandoquidem infinitis exemplis constet mortem prius dubiam, aut saltem remotam longius, percepto mortis timore, propiorem certioremq[ue] accidisse. Unde *Hipp. Lib. de decente habitu.*  
 „ Neque, inquit, quidquam eorum, quæ instant, aut facta sunt, ipsis indicet. Idecirco  
 „ enim multi ob commemoratam instantiam  
 „ aut post futurorum prædictionem, ad extre-  
 „ morum alterutrum detrusi sunt. Quale  
 præceptum & *Aratæus Capp. pag. 102. in cu-*  
*ratiōne sincupes dedit. Ergo hæc ægrum celan-*  
*da sunt. Si necessarii ejuscordati constantesque*  
*animo fuerint, is Medicus, quid subsit, indi-*  
*caro*

care potest ; certus quod ægrotantis animum timore mortis dejecturi non sint ; sæpe vero & inconsolabiles amici Medicorum monita cælare vis possunt : Hinc Medicus ab una parte rem indicare veretur ; ab altera parte præ animis Religione hominem eo disponi optans , ut efficiat ea , quæ mortalem vitam cum immortali jamjam commutaturo convenient , aliquid subindicare cogitur . Porro si Mors brevi subsequatur , vituperant amici Medicum , quod ipse mortem certo pronuntiare nequiverit , ni forte quidam ultra pergent , asserantque mortem sua ipsius culpa accidere debuisse , qui absolutum ipse periculum presagire non potuerat . Nonne certum est vel hinc periti sagacisque Medici in dubium vocari peritiam , vel etiam aliquando artis firmitatem ?

Quarta hujus §. objectio petitur ex errore ; quem magnus *Hipp.* ipse fassas est . Verum error hic , nec artis nec proprium peccatum contentis vitio cedit . Quid enim ? secundo §. dixi multis experimentis ; & periculis captis Artis tandem formam accessisse Medicinæ : si signa proinde distinguendi cranii fissuram ab ejusdem futura nota omnino haud erant , quo tempore *Hipp.* hunc errorem commiserat , num ne vel hinc artem floccifacias ? Eodem argumento aliarum artium disciplinarumque detrahes auctorati , quas omnes tempore , & usu perpoliri exornarique necesse fuit . Quin & infortunium

infons *Hipp.* ansam dedit excogitandi Methodum, qua error in posterum præcaveretur. Unde in *Libro de vuln. cap.* jubet atramento affuso, dein deterso, explorare ex atramenti reliquiis futuram an fissata sit, certis aliis deinde signis hujus rei diagnosin cultissimam auxit ditavitque Chirurgia. Ut proinde neque ex hoc lapite contemnenda ars sit.

Verum præterea tantum abest, ipsi Hippocrati vituperio hoc cedere, ut bonum virum summis potius laudibus accumulet: quippe qui semel deceptus adeo propriæ famæ non studuit ut infontem tunc temporis errorem posteris tradierit, quo præmoniti in quos scupulos ipse impegerat, hos ii evitarent.

Unde & apud magnos viros præclaræ hanc ob causam gloria cluit æternumque cluet *Hippocratis* men. sic *Celsus Lib. 8. cap. 4.*, a fuituris, inquit se deceptum esse *Hippocrates*, memoriæ prodidit, more scilicet magnorum virorum, & fiduciam magnarum rerum habentium. Nam levia ingenia, quia nihil habent, nihil sibi detrahunt. Magno ingeniio, multaque nihilominus habituro, convenit etiam simplex veri erroris Confessio; præcipueque in eo ministerio, quod utilitatis causa posteris traditur, ne qui decipientur eadem ratione, qua quis ante deceptus est.

Unde *Plutarchus* notante *Foesio*, hanc ingenuam erroris confessionem ita celebravit, ut eum

veluti exemplum, quod imitentur, cunctis proponat eruditis „Qui re ipsa proficit, ait, Hippocratem sibi imitandum proponit; errorem suum de capitis futuris prohtentem, & in scriptis referentem; secum indignum videri reputabit si, (cum ille errorem suum indicat ne cæteri in eundem errorem inciderent,) Ipse quidem suæ salutis cupidus, non audeat suam stultitia, & inficitiam prodere atque confiteri.

Hinc & ipsum imitantur quotquot in arte boni extiterint unquam. Ingens Sydenhamus vira deo clarus in arte, ut satis superque antea visum fuerit, fatetur candide quod, ubi per XX. annos in curandis febribus felicissimus fuerat (ita etiam ut *Baglivio Medicus Febrium narrat* Εξοχην audiret) tandem febrim Pestilentialem, sese nondum a priori, methodo egressus, primum inde ægrotantem Matronam plurimum læserit. Quem certe errorem, infons quamvis fuerit, tamen posteritati tradere veritus non fuit, ut ipsius infortunio saperent cæteri. Vidi pag. 121. 122. ut & pag. 556.

Memini audivisse me narrantem celebrissimum ubi vis Boerhavium, juniores sese aliquos commisisse errores, quos subindicasse e nostra re fore existimabat: imo ne veritus quidem fuit laudatissimo suo Chemicœ tractatui casum inserere, quo Tyrone Præceptoris infortunio edoceremur, quanta sit prudentia in arte opus: quam-

quamque perniciosum sit ex juvenili ardore tumidum successu Medicum ab unius curatione ad curationem alterius concludere . Vide process. 192. tract. chem.

Perpauci sunt, fateor, quibus tam nivei candoris peccus superi largiuntur : at diffitebitur nemo longe tranquilliore vita homines usuros, si magni in omnibus scientiis & Disciplinis viri, quos subinde, ut ut leviusculi fuerint, errores committant, pro eo, quo sunt, candore faterentur. Quod cum inanissimo famæ deroganti metu negligant, dissidia studiaque partium inter suos Discipulos, per fas & nefas suorum quosque Preceptorum figmenta propugnantes, alunt foventque ; atque ita omnium hinc oriundorum malorum caussæ, existunt.

Supereft ad 5. hujus §. objectionem respondeam . Fateor horum omnium quamplurima, & extitisse olim , & hodie dum extare, exempla . Verum simul in his omnibus artis salutifera prætervideri monita affirmo ; quæ certam in certis, in dubiis dubiam, nullamque in plane incertis responsionem dari consulentibus velit . Verus est qui de *Drelincourtio* casus narratur ; at artis ille, quam tam egregie callebat, præcepta prætervidit . Parisini obstetricantes, quorum crassissimi errores in objectione narrantur, artis suæ vel ignari, vel saltem obliti fuisse videntur ; quando ex menstruo perseverante fluxu, vel ex habitu pleniore corporis, haud im-

prægnatas mulieres pronunciavere. Quoad objectam difficultatem de distinctione difficili graviditatem inter hydropemque, haud plane diffenter. Celeberrimus in obstetricia arte *Moriceus* observ. 70. 143. 294. ut & alibi plura exempla fœminarum attulit, quæ simul, & hydrope, & comuni IX. mensium morbo laboraverunt. Hinc certe plures fallerentur necesse fuit, si horum ex alterutro alterutrum negaverint. Idem Moriceus graviditatem cognitu aliquando tam difficilem esse observat, ut XXIV. exemplis demonstret fœminas gravidas fuisse, quas impregnatas fere nemo suspicatus erat, nisi qui ultra consuetas pronuntiandi Leges & contra pertinacissimam fœminarum negationem, ad alia respiciebat. Quod cum aliquibus in casibus fieri nequeat prudentes in arte viri ultra id, quod ars promittit, progredi non ausi carent sibi a præpropero nimis pronuntiatu; ne aliquos turpiter fallant ipsique fallantur. Quamvis, & hoc sæpe accidisse constat, quod in ambiguo casu data a rerum perito dubia responsio, tamquam certa in vulgus spargeretur: quæ deinceps veluti certi prognostici, aut diagnostici gloriam non merenti adscriptis, vel pessimi Vatis ignominiam insonti inussit.

## §. IV.

*Ipsos Medicos suam curtam prodere suppellecti-  
lem, dum quotquot probi inter eos existunt,  
ingenue fatentur complures se morbos sanare non  
posse: imo plures morbos eorumve causas se  
ignorare.*

Hoc jam olim quamvis non Medicus ele-  
ganter cecinit. Naso Lib. de Ponto Eleg. IV.

*Non est in Medico semper relevetur ut æger,  
Interdum docta plus valet arte malum.*

*Cernis ut e molliè sanguis Pulmone remissus  
Ad stygias, certo limite, ducat aquas  
Adferat ipse licet sacras Epidaurius Herbas,  
Sanabit nulla vulnera cordis, ope.*

*Tollere nodosam nescit Medicina Podagram  
Nec formidantis auxiliantur aquis.*

Magnus quoque Hipp. & candidi omnes Me-  
dici id fatentur, arctosque quibus præclara ars  
circumdatur, cancelllos pandunt. Omnes boni  
Philosophi, Mathematici, quin & ipsi Sacrorum  
Oraculorum interpetres infinitis in casibus scien-  
tiae, artisve, quam colunt, angustos limites  
agnoscunt. Hinc videant qui hanc ob causam  
Medicinam vituperant, in quantos quamque ve-  
nerabundos alios viros stulte insiliant.

Veram ut, cum aliis, hoc commune habeat  
Medicina, quod in nonnullis deficiat; tamen  
id insigne præ aliis habet, ut ex iis ipsis quæ  
suam

suam excedere potestatem agnoscit , doctrinam cumprimis utilem conficiat .

Ita Magnus Hipp. lib. de Artic. pag. 824. 825. de insanabilibus locutus . „ Hæc ad ar- „ tem, *inquit*, Medicam nihil pertinere dixerit „ forte quispiam . Nimirum quid attinet de „ his , quæ nullam aplius curationem admit- „ tunt , copiosiorem adhuc doctrinam facere ? „ istud vero plurimum refert . Eadem enim „ notione , cum ista ( nempe curatu possibi- „ lia , & impossibilia ) inter se se separari ne- „ queant , comprehenduntur . Danda siquidem „ opera est , ne quæ curationem admittere „ possint , incurabiliæ evadant ; prospicientes „ quanam potissimum ratione prohibeamus , „ quo minus eo deveniant ut incurabiliæ red- „ dantur . Quæ vero nullam curationem ad- „ mittunt prospicere etiam oportet , ne maxi- „ me noxia efficiantur . Prædictiones autem „ splendidæ & laude dignæ ex eo existunt , „ quod dignoscamus quoniam , & quanam ra- „ tionē , aut quando res quæque exitum habi- „ tura sit , sive eo tendat ut curationem reci- „ piat , sive curationis spem adiimat .

Jucundum erit aurea hæc Hippocratis ver- ba tripartitum divisa paulo propius conside- rare .

Vult primo a curabiliibus morbis incurabi- les distinguamus , ut nervos contendere omnes , antequam incurabiles fiant , moneamus . v. g.

in Pleuritide , in Peripneumonia , accersitus Medicus vere Hippocraticus præmente habet hancce Doctrinam , quod scilicet , si sæviat nimium morbus , suboritura sit vel immedicabilis nobilium gangræna partium hominem brevi peremptura : vel suppuratio earundem partium , quæ si rupta , sursumque repens ægrum ilico non suffocet , eum Phthisicum reddet , post viros cruciatus , & miseram vitam utcumque protractam ; mortem illatura ; ni forte rarus casus contingat , quo homò bonitate naturæ pus ex vomica sua cum successive , tum integre evacuet , ulceræ dein probe deterso , atque mandato : vel scirrhi , hincque asthmata dira , & diuturnæ ærumne , si morbus eo usque debilitetur , ut ingens languor furori succedat , quæ miserum ægrum excrucia bunt crudelissime , vel subitanæ morti ereptum , lentæ tradent .

Hinc sapientis Medici in ægrotorum salutem intenti est morbi impetum tam prudenter moderari , ut nec a sævitie nimia gangræna fiat , abscessusve harum partium , nec a moderamine nimio vires omnino prosternantur . Dixerat ingens *Hipp. Aph. 2. num. 42.* „ Solvere „ Apoplexiām vehementem quidem impossibile , „ debilem vero non facile . „ Hinc sane divina est doctrina illa , quæ me doceat ad prima eaque manifestissima signa futuræ propediem Apoplexiæ cunctis velis contendere rem-

Femisque, ut illa, quæ semel nata, atque fixata, vel omnino non, vel saltem difficillime curabilis est, in suis primordiis præfocetur. Scio Phthisin, maxime hereditariam, incurabilem esse, ni prius sanguinis sputum præcaveatur. Quare meum erit sedulam navare operam ne umquam Hemoptœ contingat, quæxitate illa in hacce familia contingere solebat. Hæc utilitas prima, eaque cum maxime insignis, doctrinæ de insanabilib[us] morbis.

Alter scopus *Hipp.* tradendæ hujus doctrinæ est, ut præcaveatur, ne quæ insanabilia mala sunt, magis noxia efficiantur; sed ut reddantur quantum ejus fieri potest, tolerabilia. Vocatur Medicus ad hominem cui ex inflammatione ventriculi, aut intestinorum tenuium scirrhus in loco firmatus remansit; quem certe novit esse passim incurabilem. Novit proinde suarum tantummodo partium esse, ut hominem tali Diætæ, tali vitæ Regimini addicat, quæ nulla ratione scirrum irritare possint, lubeatque ab omnibus religiosissime abstineat, quæ vitam adhuc utcumque tolerabilem, scirrho jam in dirum mutato cancrum, quovis carnificio intolerabiliorem reddant. Podagram firmatam Medicina, quantum scio, insanabilem pronuntiat; quidquid jactitabat olim *Paracelsus*. Quin, & ipse in Cæsaream aulam accitus respondere prossimis non potuit. Empyrici complures inani spe fefellere Magnates,

quibus & nummos infinitos emunxerunt, & morbum reddidere pejorem. Namque vel ad tempus tam feliciter eum profligarunt, ut immanior longe frequentiorque deinceps redierit, vel ita ab iis, quas occupabat exedebatque, partibus fugarunt, ut nobiliora viscera occupans mortem intulerit: ut ante aliquot annos patuit usū Radicis *Aristolochiae rotundæ*, sive *tenuis*: quæ, ut narrantem audivi Clariss. Virum Oosterdyk Schagt, Præceptorem meum maxime venerandum, hac in urbe ceu summum in Podagra arcanum venditabatur: cuius ope curationes miræ visæ; sed tamen hoc infaustissime cum successu, ut deinde quamplurimi morerentur post dirissima symptomata, nec discrimine evaderent alii, nisi peccante materie ad illud, quod obsederat, ante membrum revocata. Qui hoc novit Medicus unam habet, ad quam confugiat, sacram Anchoram, scilicet Diætam vitæque Regimen tale, quo observato morbus longa annorum serie tolerabilis fiat, aggrediaturque cum vicibus rarior, tum sævitiae mitior.

Jure ergo meritissimo Cl. Boerhaavius in Iudatissima *atrocis rarissimique Morbi Historia altera pag. 2.*, Utinam, inquit, firma lege „ constitutæ essent notæ, quibus medicus fa- „ nari, nescios dignoscere queat Morbos, atque „ ab iis, qui artis opem tractabiles admittunt, „ caute distinguere? Nonne felicius longe di- „ sci-

„ sciplina hæc possit exerceri? Vel ea utique  
 „ gratia imprimis , quod contrariis sëpe re-  
 „ mediis haud exasperaretur , quod corrigi ne-  
 „ fas . Utinam in ordinatas ergo Clasfes di-  
 „ gestos cerneremus morbos sanabiles , atque  
 „ insuperabiles penitus ! ne negligenter illi ,  
 „ ne temere hi , quotidie tractarentur ab his ,  
 „ qui præterquam quas res ipsa habet mole-  
 „ stias , majora sëpe incommoda arte inani  
 „ aggravant .

Tertio denique tantum abest ut insanabilium doctrinam dedecori esse Medicinæ credat *Hippocrates* , ut potius immortali eam gloria hinc clarescere censem; quando Medicus probe instructus ejusdem limites exilire non ausus futura prædictit. Unde & alio in loco Medicum , qui morbum omnino sanari impotem insanabilem esse pronuntiat , non minorem artificem esse censet eo , qui sanabilem curat . Videri potest lib. ds *Arte* .

Addi forte pro quarta ratione possit doctrinam insanabilium malorum hinc utilem esse præprimis , ut pro sua quisque virili studeat aliquid , quod morbum ex hac lugubri Clasfe eximat , indagare . Namque , ubi in Catalogo Medicorum video Phthisin veram , Apoplexiā illam quæ *Hippocrati* *τσχυρη* nuncupatur , scirrhos completos Cancrosque extirpatu impossibiles , Podagram , vulnera complura &c. pro insanabilibus haberi , non est quod

credam nemini umquam sanabilia fore. Vesicæ urinariæ perfectio *Hippocrati* lethalis fuit, ac revera erat; posterior autem ætas comprobavit ope Catheteris Urina perpetuo educta, persanari vulnus, illudque ita insanabilem Classi exemit. Venerea Lues dum Europæos primum invasit incurabilis habebatur; deinde vero mortalium industria curabilem se esse demonstravit. Vidi mus §. 2. vulnera a tellis Indorum venenatis inficta fere incurabilia, deinceps usu herbæ *Mungos* curata fuisse. Narrat *Hieron.* *Cardanus* fuisse hominem in Longobardia adeo vagabundum, ut ad compositum ordinatumque vivendi genus perducere eum nemo posset, qui idem insipido Medicamento Cancros re ipsa curabat; quem, quia arcanum ante mortem non revelaverat, credit *Cardanus* æternas jam apud inferos penas luere. Qualis historia, & de homine alio in Patria Leodiensi, & Brabantia idem efficiente scriptis proditur. Quidni & in humana rum calamitatum solamen idem aliquando tum in hisce, tum in aliis, futurum credamus? Dies forte dabit, quod hora negat. Interim quamdiu sapientissimo, & beneficentissimo rerum omnium Moderatori hunc nobis favorem concedere non placet, nostrum erit præclaræ intra limites Artis quietos & contentos esse.

Ultimum quod in objectione dicebatur, spe-  
cta-

stabat morbos quosdam , quos ipsos , eorumve causas Medicus ne indagare quidem possit .  
 Hujus rei exemplum unum , alterumque dedit Cl. Boerhavius in historia mortis Nobilissimi Architalassii nostri de Wassenaar , & Marchionis de S. Auban ; quos binos tractatus eo conscripsit scopo , ut ostenderet impossibile fuisse hos morbos quisquam ut a priori cognosceret ; deinde ut si hos eosdem morbos deinceps aliquis cognosceret , simul curationis intelligeret impossibilitatem . Vide Hist. primæ pag. 60. & Hist. ult. pag. 29. & 30. Verum si vel hinc Medicorum ordo minoris habeatur , crediderim & reliquarum ferme omnium scientiarum Proceres longe minoris , quam nunc merito habentur , habendos fore . Probi viri est magni facere quotquot in communione bonum eo , quo a Deo donati sunt , lumine utuntur ; nec minori eos honore prosequi , qui ultra limites sibi circumdatos exsilire non ausi , ignorantiam quarundam rerum viresque imbecilles , candidi fatentur .

### §. V.

*Homines plures absque Medicorum-  
ope cutatos .*

*Lib. de Arte* hanc sibi objectionem refellendam *Hippocrates* sumens , ait vel hinc Medi-

cinæ maiestatem , atque gloriam summopere  
 inclarescere ; siquidem homines citra adhibitos  
 medicos sanati , cæco tantum impetu , & casu  
 aliquid gesserint , vel non gesserint ; aliquid sibi  
 incecerint , vel non ingeßerint ; aliquid sibi  
 applicuerint , vel non applicuerint ; ex quibus  
 factis , vel omissis melius pejusve habuerunt .  
 Quod si ergo hi forte fortuna sanitatem ade-  
 pti sunt , tanto majoris medicinam esse facien-  
 dam ; utpote quæ ex antiquis , & perpetuis  
 observatis ejusmodi Regulas habet , quæ do-  
 ceant an , quæ , quomodo , quibus , & quando  
 omnia hæc facienda , vel omittenda sunt . Sa-  
 ne hisce *Hippocratis* verbis vèrius nihil . Si  
 enim homo artis Nauticæ plane ignarus per  
 indomitum mare nave vectus , felicem tandem  
 portum nanciseretur , hic nauticam Artem non  
 nisi summa cum injuria vituperaret , cum e  
 contrario Artis hujus præstantia vel hinc ma-  
 xiime innotesceret ; utpote quæ ejusmodi præ-  
 cepta tradat , quibus vela componere , gubernacula  
 dirigere , evitare syrtes , ventos observare ,  
 acum contemplare nauticam , & infinita id  
 genus alia edocti nautæ , id semper ex arte  
 faciunt , quod jactator ille semel fortunato ca-  
 su fecerat . Qui idem si ventos procellosos , si  
 incognitos scopulos offendisset , naufragium pas-  
 sus fuisset , quia ex arte instructus non erat .

Sic fateor , sanantur casu aliquando citra  
 Medici opem homines , idque longe , lateque  
 fama

fama divulgat ; sed quot homines e contrario non accersito Medico intereant , atra tellus abscondit , gremioque occultat suo . Qui vero sanantur si sine Medico , saltem non sine Medicina , sanantur : cum ignari omnino id vel gesserint , vel non gesserint , quod ex firmis artis principiis bonus Medicus facere , vel omittere , vel moderari se oportere , e re fore judicasset .

## §. VI.

*Sanatos homines adhibitis quidem Medicis , sed iisdem vel ab ægro , vel a Pharmacopola deceptis .*

Fateor nonnumquam id contingere quod obiectio prima parte habet : Causamque cur sic nonnulli emergere periculo visi sint , triplicem reor .

1. Homines hi malum nacti erant Medicum , spontaneoque appetitu ducti ejusmodi sumserunt quibus bonus Medicus ad morbum expugnandum meliora non novisset . Hoc postea patebit §. VII. Vel 2. peccarunt hi ægri contra Medici mentem in re minimi momenti , ita tamen ut præcipuum curationis scopum evertere non potuerint . Vel 3. graviter peccantes in Medici præceptum bonitate Naturæ morbum nihilominus vicerunt . Hoc §. VIII.

VIII: latius. Verum quot miseros contra numerare licet, qui sic agendo pessime habuerint? Bene ajebat *Hipp. lib. de Arte.* Homines fortunae adscribere, si qui bonum nacti Medicum, eique obaudientes emergerent; medicorum vero imperitiam accusare, si qui contra eorum præcepta clanculum peccantes interirent. Imo iis, qui Medicorum monita spernunt, morientium numerum denso augeri agmine credit.

Hinc saltem patet non nisi fortuito ejusmodi homines convalescere, plurimos vero sua ipsorum culpa interire. Ergo neque vel hac ex parte Medicina vituperanda.

Verum si digredi extra orationis cancellos, vel paululum licet, adnectam libenter unam alteramve considerationem.

Quod Medicorum monita spernantur, hoc vel ipsorum Medicorum, vel ægrorum, vel denique ægris invigilantium custodum vitio fit.

Medici namque ipsi materiem medicam non edociti compositiones absque ullo iudicio præscribunt: quas, utpote sapore nauseosas, aspectu horrendas, odoreque intolerabiles ægri ita fastidiunt, ut mori, quam sumere, saepe malint. Præterea frequenter id animadvertis, ut Medici, Chirurgique in semet ægrotantes benignissimi, quovis aliquando Tyranno crudeliores fese in alios præsent; quod si Medici

com-

commisserationis erga proximum meminissent, tædiosa pocula in ameniora, detestandos bolos in facilius ferendos, medicamenta alia adspectu, odore, sapore, quovis carnificii generæ atrociora, facili Marte mutare ingratissima; aut saltem in minus ingrata possent. Quam artem Expertiss. van Swieten serio crebroque inculcavit discipulis suis, quorum e numero me fuisse gratus agnosco.

Cur enim, si formulas simul, & indicatio-  
ni morbi, & ægri placitis respondentes con-  
cinnare possimus, non concinnaremus? cur æ-  
grum suo jam satis miserum morbo frustra  
torqueremus? præcipue cum hæc imprimis u-  
tilitas hinc oriatur, quod ægri tanto obedien-  
tius gratiora sumant?

Dolendum profecto quod tam parum huic  
rei studeatur. Electuaria dicta miscent hausti-  
bus purgantibus, in quibus, a pulpa cassiae, a  
pulpa prunorum &c. ingrato adspectu flocculi  
inhærent, qui nauseam cœrant; cum tota effi-  
cacia pendeat a Scammonio, a Rhabarbaro, a  
foliis sennæ &c. quæ seorsim sine illis pulpis  
semper prostant, ut mixturis diluantur. Quid  
ergo impellet Medicum ægros suos frustra ut  
si torqueat, cur decocti ingrati fastidium  
corticibus citri, vel alijs gratissimis additis  
indicationi non repugnantibus, vel eidem fa-  
ventibus, non corrigemus? Præsertim cum  
nauseosa illa nauseam, vomitum, anxietatem,

faciant , quæ ægri obsunt , orroremque incitunt a medicamentis . Sic felices tunc existimant se ægri , si Medicum fallere queant , respondentque ipsi redeunti remque roganti ea , quæ jusserat , absunta esse : Lagena interim aut Pyxide clam in cloacam evacuata . Profecto & in his , & in omnibus humanissime cum egrotis agendum esse summi Artis parentes docuerunt . Sic *Hipp. Epid. VI. sect. 4. n. 7.* „ In quibusdam „ ægrotis est gratificandum , velut est ut scilicet „ cibus , & potus pure conficiantur , puraque „ sint quæcumque viderint , & quæ tangunt „ , mollia . In aliis quoque gratificari oportet , „ quo non magnam noxam afferunt , aut quæ „ facile sarciri queat , veluti frigida , ubi ea „ , opus est . In his etiam Medicum ægroto se „ gratum præbere convenit , qualia sunt in- „ gressus , sermones , corporis habitus , ve- „ stitus , tonsura , ungues , & odores . *Aræteus Cappadox de cur. acut. lib. 2. cap. 2.* in Epi- themate præscribendo jubet grata odorifera , prout medicaminum efficacia , lenitate , odore , opus est , admisceri aliis „ , siquidem & ægro- „ , tantibus gratificari decet . „ Et *lib. 1. cap. 1. de cauf. & sig. chron.* loquens de diurnorum morborum molestia „ , Mehercule , inquit , in „ magna animi constantia diu præstanda , au- „ xiliis variandis , jucundis citra noxam ægro- „ , concedendis , ipsoque dociendo , Medici „ , virtus atque excellentia dignoscitur . „ Er- fant

rant itaque turpiter, qui suam erga ægrotantes severitatem Antiquorum severa, & tetri disciplina larvant: cum venerandæ Antiquitati nil acceptius esset; quam sapienti morum gravitati comes nobilissima urbanitas, pectore candido nata, non ficto animo exhibita; cui nobilissime virtuti modernorum urbanitas ne vix quidem comparari possit. Hæc de Medicis qui partim in culpa sunt, quominus medicamina ab ægris assumantur.

Verum ipsi sæpius ægroti eorumque custodes dicti, maximam partem in causa sunt hujus infortunii. Namque vel ex negligentia, vel ex perverso ægri appetitu, vel ex imaginaria sapientia, qua custodes ægrorum, maxime mulierculæ, Medicis præstare se autument, salutaria eorum monita circa victum medicamina, totumque rerum non naturalium usum floccipendunt, redeuntique Medico, ac rem subolfacienti, mendacia vendunt.

Quam rem expertus Hipp. monuit Medicum qua singulari ratione id præcaveat. *Lib. de decenti hab.* „ adsit, inquiens, & discipulis „ aliquis, qui præsit, quo præceptionibus ci „ tra amarulentiam utatur, & quod imperatum „ est subministretur, ex his vero diligendi, „ qui jam in arte proiecti sunt, ut ea, quæ „ sunt usui exhibere, vel secure offerre sciant, „ neque in intervallis quidquam te lateat. „ Nullius vero rei curam plebeis umquam „ , com-

,, committas; alioqui ejus, quod male factum  
 , est reprehensio ad te redundabit. ,, Certe  
 cum senior tunc temporis Medicus discipulos  
 sub sua cura erudiendos semper secum habe-  
 bat, poterat ille ingenti cum suo ægrotique  
 emolumento aliquem, qui ægro invigilaret,  
 redeuntique Medicos omnium rationem redde-  
 ret, præficere.

Quare jure merito feliores hac in parte  
 existimamus cum Medicos, tum ægrotos, in  
 Brabantia, vel alibi ubi Religiosi ordinis viri  
 vulgo *Alexiani* dicti ægrotantibus viris, & fæ-  
 minæ dictæ *Sorores nigræ* ægrotantibus fæmi-  
 nis invigilant, Medicum dum ille ægrotum  
 invisit, audiunt, stricteque, quæ ille jusseric  
 obseruant; ac redeunti omnium, quæ gesta ab  
 ægro, & circa ægrum sunt, rationem examus-  
 sim referunt.

Qui quidem felicitatis gradus obtinendi e-  
 jusmodi homines, qui unice huic negotio de-  
 putentur, cum difficile acquiratur; nostrum e-  
 rit, quantum ejus facere possimus, probatos  
 huic negotio homines præficere; prudente-  
 que, atque humaniter arcere eos, qui vel ipsi  
 Medicinam facere deprehenduntur, vel con-  
 tra citrave Medici mentem ægrotantem diri-  
 gunt.

Sed ut eos, unde digressus sum, revertar;  
 ultima objectionis pars spectabat ægrotos, qui  
 Medicis a Pharmacopæo deceptis convalescunt.

Hos

Hos curari posse aliquando negare nolim ,  
 1. in re minimi momenti Pharmacopæo pec-  
 cante ut v. c. ingredientis alicujus dosin paulo  
 majorem minoremve exhibente , qua in dosi  
 permutanda periculi suberat nihil.

2. Mirum aliquando non est ægros conva-  
 lescere , quando Medici merito decipiuntur :  
 præscribunt enim nonnunquam pinguedinem u-  
 nius animalis , quam superstitione pinguedini ,  
 aut medullæ alius animalis præferunt . Plures  
 aquas stillatias religiose distingunt , quas cal-  
 lidus Pharmacopola probe novit neque a se  
 invicem , neque a pura aqua destillata vel cru-  
 da , viribus differre . Pulveres absorbentes ex  
 corallis , ex matre perlariū , ex margaritis  
 pretiosis , præferunt Cretæ , lapidibus cancro-  
 rum , &c. In his , & ejusmodi farinæ aliis  
 cum decipiuntur Medici , non est quod mul-  
 tum damni inde patientur ægrotantes .

3. Ut alia occasione paulo ante dixi non-  
 nunquam emergere possunt ægri hujusmodi et-  
 si pessime peccaverit Pharmacopæus ; quando  
 bona fortisque Natura morbum non modo ,  
 & adversa remedia vincere novit , maxime  
 quando per se gravissimus morbus non sit.  
 Ita pulcre *Hipp. lib. de prisc. Med. pag. 11.*

Verumtamen & hoc cuivis exemplis heu !  
 nimium tristissimis constabit plurimos pessime  
 habuisse , vel & interisse ægrotos , quorum  
 Medicos ita luserant pharmacopæi .

Unde ratione omni non caruerunt eorum monita , qui Medicum suas ipsius adornare , & præparare formulas debere censuerunt . Horum ex classe non infimus fuit Nobilis Eques de *Montaigne* in libro suo *Essais* gallice dicto . Verum idem ille Vir præ ardore impetuque refellendi Jurisconsultorum ac Medicorum vitia , non semel totam vituperat disciplinam , sibique obloquitur multis sane in locis . Nunc enim necesse ait suas omnes , ipse ut paret Medicus , formulas : Nunc iterum ait Medicum , qui jam non amplius antiquo Ægyptiorum more uni tantum morborum generi , sed plerisque curandis se paratum exhibit occupatiorem esse quam ut ea , qua par est sedulitate , atque industria singulis invigilet . Neque etiam antiquis illis temporibus , a Medici officio erat separata Pharmacia . Ut proinde Vir nobilis alterutrum dicendo se ipsum explodat . Sane si ab una parte e re fore arbitramur medicamenta ipse ut paret Medicus , quo , & tutius procedat ipse , & æger minus periculi subeat ; mox ab altera parte magna enascitur suspicio ne is , qui ægrotis invisendis totus occupatur , præparandis medicaminibus sufficiat . Si cordati Medici praxi multis ab annis , jam assueti testantur , ut ipse audivi , se tutos in conscientia non esse , nisi singulo die bonam temporis partem annotando , & meditando insumperint , ut quæ a se gesia sunt examinent ,

quæ-

quæque in decursu morborum , licet haud insolitorum , sibi , prout sese offerent casus , agenda erunt , præmeditentur ; fere concludo Medico modicam exercenti praxin temporis forte satis cum studendo , tum præparando , af- futurum : plurimam vero praxin habenti timendum fore , ( quod inculcantes sæpe præce- ptores audivi ) ne ejusmodi Medicus Empiri- corum moribus sensim , atque inscius assuecat ; id est , ne formulam unam eandemque sæpe præparatam in memoria habens paucis præpa- rationibus plurimas replete lagenas : nisi forte domi apto gaudeat famulo , qui huic negotio solus sufficiat quamquam , & absens ab illo fa- mulo Medicus bonis Pharmacopæis æque fide- re forte possit .

Quare laudandus potius magnarum in no- stra Rep. urbium mos , quo , juxta probatum cuique urbis Medicorum collegio Dispensato- rium , Pharmacopæi sese gerere sub magnis pœnis , legeque severa teneantur , ita ut Medi- cus certus ibidem , atque securus sit de Phar- macopæorum fide , hique ipsi omnibus probe instructi opus non habeant , quid pro quo ob- trudere . Hoc tantum ultra optandum foret , ut severa lege statueretur quemque Pharma- copæum , mox a præparatione medicamenti , nomen assumpturi chartalæ ad pixidem vel la- genam appensæ inscribere oportere ; ne forte ejus famulus multas præparaciones fixul fe-

cum gerens , ut suam cuique afferat , obtrusat alienam .

### §. VII.

*Alios sanitati redditos , rerum usu earundem  
quas Medici audacissimo præsagio pessima  
quæque effecturas prædixerant ,*

Respondeo hoc aliquando contingere quando Medici effectus rerum quarundam nimis hyperbolice describunt ita ut deinceps his effectibus haud ita , ut quidem præsagi erant , contingentibus , merito derideantur .

Sed aliud est quod plus ad rem facit . Casus revera quidam sunt , in quibus natura per vehementem , ac mirabilem prorsus appetitum morbi nonnumquam remedium indicat . Homo putrida in primis viis faburra laborans , appetitu insatiabili fertur in halces , falsamenta , acetum , cerevisiam acidam , acida poma &c. quæ certe omnia putredini contraria sunt . Interim Medici frustra moliuntur per sua Stomachica dicta sedare nauseas &c. malumque augent ; quin & hanc spontaneam Naturæ indicationem spernentes quasvis teterimas , si usurpaverint ægri minas intentant ; neve ulla ratione appetita acquirere possint , amicos etiam , atque etiam serio monent . Nihilominus , non quiescente natura , æger curat clanculum sibi

sibi desiderata afferri quibus copiosissime as-  
sumptis a redeunte Medico reperitur sanatus.  
Sic dum vera morbi causa haud satis atten-  
tus Medicum latuerat, Natura ad curationem  
per se ducebatur. Cum olim Chemici plerique  
Medici, Hippocraticæ veritatis ignari, ægros  
suos acutis conflictantes ab omni omnino po-  
tu tyrannice arcerent, & interim calidis aro-  
maticisque corpora exardescientia in æstum in-  
tolerabilem conjicerent; ægri, Natura ducen-  
te, aquosa, subacidula, subfrigidiuscula infatia-  
bili desiderio appetentes, & clanculum hau-  
rientes, salutem sensim recuperasse visi sunt.  
Omnia hæc exempla, docent Naturam sagacem  
aliquando ægrotantem inducere, ut ea appe-  
tit, hauriat, iisque haustis saluti reddatur,  
quæ vel minus attentus, vel ridiculis syste-  
matibus infatuatus Medicus minax vetuerat.  
Non quod sentiam huic appetitui semper ob-  
secundari oportere, qui error foret crassissi-  
mus, ut mox dicam, sed monere volui eum  
non semper negligendum, atque cohibendum  
esse, imo attentionem Medici nonnunquam re-  
quirere. Vide hoc eleganter apud Sydenh. pag.  
367.

Verum ut ut hæcce res se habeat, casus  
hi longe rariores contingunt, quam quidem il-  
li quibus constiterit, ægros per fas nefasque  
Medicorum monita spernentes vitam cum mor-  
te, aut levem salem mortum cum gravissi-

mo , aut brevem cum diuturno commutasse . Quotiesne vel morbum atrociorem , vel ipsam mortem sibi conciliaverint ægrotantes , ubi in acutis gelidam modo quovis prohibitam aquam , aeremve affatim hausere ? Quoties ne Hystericæ fæminæ ad angores animi frequentes sanandos , doloresve Pleuritidem , vel alios morbos fere mentientes abigendos , invitis Medicis ad frequentiores sanguinis missiones confugiunt ; maxime cum post M. S. aliquantulum solaminis expertæ videantur dum interea frequenti M. S. magis debilitatæ magisque , in tristissimi sui morbi frequentiores , ac læviores incident paroxysmos ? Quis ignorat Phthisicos ansietatibus incredibilibus vexatos ad alvi purgationes , Medicis tristia frustra vaticinantibus accurrendo , fluxum alvi , mortis in Phthisi prænuntium , sibi præmature conciliare ? infinitus ero si retulerim plurimorum Podagricorum Historias , qui contra morbi fævitiem fallacia Empiricorum solamina experti , ad redintegrantes Paroxysmos eadem sibi gestiunt apponi ; frustra dehortante Medico sagaci , pro beque gnaro in hisce ærumnis moderato regimine totius vitæ , & summa tollerantia , atque patientia in Paroxysmis præstantius reperiri nihil . Hunc vero spernentes ægri ab momentaneo solamine crebriores experiuntur , fævioresque Paroxysmos ; vel materiæ podagraea arthriticave ad interiora nobilia repulsa in

In ineluctabilem mortem , aut præsens saltem ejusdem discrimen , miseri incurunt .

§. VIII.

*Multis imo teterrimis, aliquando, e morbis convaluisse homines, curantibus ejusmodi Medicis, quos famosi alii Artis Antistites tamquam methodo segnore, vel fortiore utentes, vituperant.*

Data fuit ; ni fallor, jam pluries ad hanc objectionem responsio ; quæ tamen per momentulum nos iterum detineat , tracteturque paulo explanatius .

Ad partem illam objectionis , quæ Medicos fortiori nimis methodo utentes spectat , respondebit *Sydenhamus pag. 152.* ubi tam pulcras curandarum variolarum regulas tradiderat .

„ Hæc sane , inquit , vera est ac genuina methodus . . . . & licet non negem multos regimine admodum opposito tractatos , nihilominus convalescere , fatendum est tamen . . . . plurimos etiam interire : quin & alii complures fatis pariter concederent , nisi vel a frigidiore tempestate , in quam incident morbus , vel a Phlebotomia aliter supervacanea , atque inutili , nuper celebra , servarentur . Et pag. 163. & 169. describens febris continuae variolosæ dictæ curationem . „ Hæc sane methodus ,

ait , optime mihi cessit . . . Non quod ego  
 numquam via longe contraria incedentibus spe-  
 ctator interfuerim , adhibitis scilicet cardiacis  
 , & calido Regimine, ægro nihilominus a mōr-  
 , bo sæpe liberato : ita tamen ut mihi semi-  
 „ per videretur is non mediocre discriminem  
 „ adiisse , nulla id suadente necessitate „ .  
 Deinde exempla assert aliorum Medicorum ,  
 qui calido suo regimine Petechias numerosio-  
 res , sitim immaniorem , linguam siccām ac  
 sæpe nigrām , sudores antea provocatos , pe-  
 nitus nunc intercedentes , ob exaustum sanguinem  
 effecerant ; deinde sanguine novis liqui-  
 dis replete vi medicamenti febrisque Crisi fa-  
 ciebant , coactam nimis , ac periculosam , ra-  
 riisque contingentem .

Ex *Hipp. lib. de pr. Med.* jam alibi re-  
 spondi cauſsam , cur sub violentioribus Medi-  
 cis ægri emergant , hanc esse præcipuam quod  
 æger , & vim sui morbi , & imperitiam vio-  
 lentam Medici simul bonitate naturæ vineat :  
 siquidem tunc quando , vis morbi tam magna  
 non sit , ut etiam longe graviora homo ferre  
 posset . Quam eandem rem confirmat Mori-  
 cæus , quam plurimis exemplis gravidarum fæ-  
 minarum , quæ ut hydropicæ validissimis ten-  
 tatae hydragogis , vel ut scirrho uterino labo-  
 rantes variis modis a pessimis Medicis Chi-  
 rurgisque tractatae ; vel ut menstruorum reten-  
 tione correptæ M. S. ex pede aliqua pver-

sa remedia expertæ , tamen feliciter problemenixæ sunt tempore requisito . Vide ejusdem *Objerv.* 161. 195. 224. 305. 429. 471. 524. 642. 644. 690. 697. Quæ quidem omnia docent homines suis fortioribus usos posse nonnumquam bonitate naturæ periculo emergere ; sed tamen tam parum huic drasticæ methodo favent , ut laudatus mox *Moricæus obs.* 644. pulcre adverat eodem jure Artem bellicam vitæ tutissimam dici posse , quia nisi sunt homines sine ulla vulneribus multiplici annorum serie præliis , atque obſidionibus urbium interfuisse .

Verum secundo , & alios reperias ; qui vulgo prudentissimi auditunt , quique tam lente , tam circumspete , tamque faro medicamenta paulo fortiora ingerunt , ut vix ausint dosiri ultra minimam exhibere ; vix paulo æriora propinare ; sed ægrum suo potius fatō committere , quam vel illum interturbare malint , ac quia tamen aliquid dandum , ejusmodi exhibeant , quæ certe vi sua hominem ad plures non mittent . Facile eos inducor ut crediderim , bonos illos viros ad hancce praxeos mollitiem pervenisse , quia vel proprio periculo datis intempestive acerofibus , vel audaci Agyrtarum methodo perterriti didicerant , quam truculenta sœpe atque exitialia mala hinc orta fuerint . Verum nonne hocce est ita Scylam evitare , ut incident in Caribdim ? Nam-

que non minus peccat Medicus negligendo e-  
iusmodi dare, quæ languens, stimuloque indi-  
genus Natura indicat; quam Medicamenta vel  
copia, vel vi excedentia, aut intempestiva,  
exhibendo. Quid enim? Ubi homo in aquam  
incidit, numne prudentes dixerimus eos, qui  
ad ripam stantes hominem tantum lapidibus  
non obruunt? Certe eorum erat sedulo, &  
confestim funes projicere, harpaginiæque la-  
ctanti cum undis porrigere, quibus ille abre-  
ptis in continentem duceretur. An vero illi  
cæteris prudentiores se existimabunt si hominem  
tantum ultra non demergant, otiosos cæte-  
rum humanæ calamitatis spectatores agant:  
quia viderunt audiveruntve, alios nimium im-  
petuose festinanterque agendo hominem aquis  
illapsum profundius mersisse, aut imprudenter  
porrectis harpiginibus vulnerasse lethaliter?  
eodem sane modo prudentes nostri Medici se  
gerunt. Specioso prudentiæ titulo larvati di-  
cant Naturæ tantummodo observatores sese  
Ministrosque esse, cujus impedimenta tantum  
auferenda sibi sunt, visosque non paucos hac  
sua emersisse methodo. Sed eodem pacto il-  
li in ripa agentes, & submersum non ultra  
demergentes excusabuntur, quia pene submer-  
si homines aliquando visi sunt citra auxilia-  
trices adstantium manus ripam, aut navim  
propinquam conscendisse. Sic putaverim in  
medicina facienda haud secus, qui minus ni-  
hil-

hilve ; quam qui nimium agunt , culpandos esse.

Hinc sapiens ubique *Hippocr. lib. VI. epid.*  
 1169. Μηδεν ειπη μηδεν υπεροπαν nempe , , Ni-  
 ,, hil temere agendum esse , ut & nihil negligi-  
 ,, genter , , . Et *Aræteus Capp. in curat. Epil.*  
*Chron.* , , Νυν δε χρη σδεν υπερορην , μηδε  
 ,, πρηστειν τι ειπη , , Utique nihil prætervi-  
 dendum , aut spernendum est negligenter , ni-  
 hilque temere faciendum .

Itaque quicumque in utramvis partem ni-  
 mium inclinant , peccant medium tenuere bea-  
 ti , qui & mollioribus utuntur ubi opus est , &  
 fortiora non negligunt ubi indicantur .

## E P I L O G U S.

Sic plurimas easque præcipuas , ad quas re-  
 liquae omnes referri possunt , objectiones , quæ in  
 artis quam amo , quam colo , quamque quoad  
 vixero , strenue exculturus sum , dedecora pro-  
 feruntur , si non omnino explosi , explodere  
 saltem conatus sum : cæterum sermonis bar-  
 bariem , juvenisque artem a limine tantum  
 salutantis impolitam balbatiem tum benigni-  
 tate solita , tum divinæ acutie mentis , Le-  
 stores expoliant , defectus suppleant , cuncta-  
 que æqui bonique consulant , etiam atque et-  
 iam rogo .

Quæ in præclaræ artis opprobrium objiciun-  
 tur ,

tur, candidus recensui; si quid veri sisinerat, ingenue fassus sum; si objectioni factum eandem confirmans deerat fidelis adjeci: scilicet ut integras hostium copias, quibuscum mihi concrediendum erat, totas armatas, & cataractas ab omni parte intrepide lustrasse viderer; quo & vim earundem propius cernerein, & aptissima quibuscum conflictandum erat, arma mihi adornarem.

Quod si nihilominus qui sint, quos multorum litigantium inter se Medicorum turba offendit, meminerint hi eandem quoque formam aliis quas veneramur, disciplinis, scientiis, artibusque obtigisse. Architecturam præclaram agnoscimus artem esse: Architectos autem quotidie cernimus alios aliorum operibus insultare, variosque in iisdem varia acerbius reprehendere: in qua reprehensione ne viꝝ quidem inter acutissimos Momos convenit. Facile vero ignorantiam invidiamve causam disrepaniarum agnoscimus, Architecturæ opprobrium absit, ut inde concludamus. Jurisprudentiam consideranti tam enormis occurrit sententiarum differentia, ut referre fere pudeat: attamen merito omnes maximi facimus peritiam juris, utpote oppressis aliorumque sub violentia gementibus solamen unicum asylumque. Si fas esset enarrare has easdem diversitates opinionum inter ipsos divinorum oraculorum Interpretes obtainere; conclusionis, quam ex

ex varietate opinionum inter Medicos deducunt, iniquitas Meridiano sole evidentior appareret: verum cum ejusmodi Tragœdias referre lugubre hinc illinc odiosum sit enimum de tabula.

Medicam itaque Artes favente summo Numinis auspicio, quam venerandus ejusdem parens *Hipp. lib. de flat.* mihi prædixit eorum Artium e numero esse, quæ, cum communi bono quamplurimum conferant exercentibus sese nil nisi molestias creant. Quin & divino huic Viro invidiam calumniandi præ originem non pepercisse colligimus ex ejusdem ad *Democritum* Epistola, & ex litteris *Democriti* ad *Hipp.* summi in arte Viri, quibus ob collata in humanas miseras beneficia aureæ statuæ erigendæ forent, acutos dilacerantium, & calumniantium dentes quotidie experiuntur, præsertim cum ne cerdo quidem aut capo, aut incurva vetula sit, quæ Medicum non culpet, non reprehendat, non vituperat. Sed pulcre exemplo præivit suo *Hipp.* monuitque in *lib. de Arte*, qui se gerat in hisce Medicus,, Periti Artifices, ait, non morantur imprudentes, aut reprehensores, aut laudatores res sed eos tantum qui recta ratione iudicant,,. Horum omnium clarorum Virorum vestigiis preeesse insistendo spero fore, ut & ego omnes has ærumnas transire tædiaque devorare tandem queam. Itaque salutem proximi

mi præ oculis habens , solumque in tota conscientia DEUM testem intuens , hujus mihi favorem , artis exercitum auspicaturo imploro , Ipsi acceptum relaturus quidquid in humanarum calamitatum solamen vel docte ex cogitavero , vel rite administravero , vel probœ gessero .

F I N I S.

# C O R O L L A R I A

I.

MUltæ varieque circa Chylopoiesin opinio-  
nes inter se se conciliari inque usum vocari  
possunt, dum statuimus in plerisque aliquid  
veri inesse in eo vero errasse earum auctores  
quod suam quisque opinionem ad totum chy-  
lificationis negotium perficiendum sufficere  
faterint:

II.

Sylvii autem sententia de Bile alcainina, &  
succo pancreatico acido ferenda non videtur,  
nec etiam necessaria est: ut nec Helmontii  
opinio de Acore vitali venticuli.

III.

Si quis omnia chylopoiesios instrumenta re vera  
demonstrata examissim intelligat, iis omnia  
eiusdem Phænomena rite exponere videtur  
posse.

IV.

Materia spirituum videtur in arterias corticis  
cerebri cerebellique a sanguine arterioso  
secerni, & hinc per medullam, ceu per va-  
forum continuationem derivari in nervos.

V.

Per nervos fit a sensorio communi determina-  
tio ad corporis partes sensui & motui, tum  
vo-

voluntario, tum spontanea, destinatas, ut & impressio a partibus sentientibus ad sensuum commune.

## VI.

A cerebello secernuntur qui vitalibus actionibus inserviant spiritus.

## VII.

Minima vita in homine requirit ad minimum liberum utrumque circulum humorum versus cor destrum, inde per pulmoes, ex pulmonibus a cor sinistrum, a corde sinistro ad cerebellum hincque iterum aliquem spirituum vitalium affluxum per Nervos cardiacos atque Pulmonarycos.

## VIII.

Non datur panacea.

## IX.

Nullum fere alimentum aut medicamentum salubre vel noxiū dici potest, nisi is, qui hoc dicturus sit ad varias hominum naturas aliasque complures circumstantias respiciat.

## X.

Erros propemodum infinitos peperit apud Ignatios Mos quo Medicamenta in antispasmodica, antapopleptica, antiscorbutica, ac dividuntur: ut & ille, justa quem eadem in cephalica, cardiaca, stomachica, uterina echolica, &c. distribui solebant.

## XI.

Decocta Vulneraria , quæ Belli Ducibus prou-  
sunt , Militibus plerumque obesse deprehen-  
dantur , & viceversa .

## XII.

Medici iudicibus de vulnere renunciaturi an-  
xiām conscientiam tria hæc tranquillam red-  
dunt , 1. Exactissimum sentissimumque ex-  
amen vulnerati , tum quoad vulnus tum quo-  
ad statum in quo is ante vulnus erat , tum  
etiam quoad bene maleve tractatus mox a  
vulnere fuit 2. casta eorundem descriptio fa-  
cta iudicibus , qui DEI MALORUM VIN-  
DICIIS nomine veritatem inquirunt 3. Pru-  
dentissima cautela ne vel verbulo Reum , ul-  
tra quod severissima indago docuit oneret .

## XIII.

Peccatum cui venia concedi nequit , aliquando  
committitur , dum fractum os reponitur quam  
pulcerrime .

## XIV.

Pessima luxatio sæpe immedicabilis & claudica-  
tionem perpetuam faciens , oriri visa pluries  
ab incauta gestatione infantum in Brachio  
matris nutricis , custodis .

## XV.

Causa stupidi ingenii multorum hominum , ipsius-  
que fatuitatis perpetuae , haud quaquam in-  
frequens est illa non toleranda libertas qua-  
mu-

mulieribus opiata a pharmacopeis emere licet quibus morosos infantes sopiant.

## XVI.

Facultatem in matre esse mutandi quem utero gerit fætum , agnosco : rationem vero quid fiat ignoro .

## XVII.

Interim laudabilis mos est sapientum matronarum , quæ gravidæ mulieris , ab aliquo insolito horridove objecto perterritæ mox manus apprehendunt , ne illa alicui corporis parti easdem eo tempore applicent .

## XVIII.

Quum canina rabies tam perniciosa sit , curatunque tam difficilis expediret ut canes numquam nisi bene capistrati exirent , vel domi semper detinerentur ; præstaret quoque scedulas monitorias in vulgus spargi , quibus exactissima rabiei caninæ indicia a principio ad finem usque graphice depingerentur , ut sic moniti homines hos canes illia occiderent .

## XIX.

Impius est , qui utile cœlat arcanum .







